



SAMOA

Faatulagaina o Aiaiga

VAEGA I FAATOMUAGA

1. Igoa puupuu ma le amataga
2. Faamatalaina o uiga o upu
3. Sini o lenei Tulafono
4. Faaaogāina o lenei Tulafono
5. Soloia o Tulafono

VAEGA II O LE PULE FAATONU

6. Tofiaina o le Pule Faatonu
7. Tauleagavaaina
8. Matafaioi, galuega tauave ma Malosiaga a le Pule Faatonu
9. Ofisa o le Pule Faatonu
10. Laisene, fusi o alaleo tau leitio ma totogifuaupauina o laisene, fusi o alaleo ma numera
11. Talosaga tetee ma le toe Iiloiloina o Poloiga a le Pule Faatonu

VAEGA III LAISENE O FESOOFTAIGA

12. Manaoga ina ia umia le Laisene

13. Aiaiga Lautele e Faasino i Laisene
14. Poloiga mo Tuusaunoaga
15. Ituaiga o Laisene
16. Taulumaga o le Laiseneina
17. Tuutuuga o Laisene
18. Teuteuga ma le Faalēaogāina o Laisene
19. Taimi e umia ai ma le toe faafouina o laisene

VAEGA IV AVANOA LAUTELE

20. Faiga faavae i Avanoa Lautele
21. Faaputugatupe mo avanoa lautele

VAEGA V PULEGA O FUSI O ALALEO TAU LEITIO

22. Galuega tauave a le Pulega o Fusi o alaleo
23. Tulafono Faatonutonu o Fusi o alaleo tau Leitio
24. Feeseeseaiga ona o le felavasai o fesootaiga ma le Faamaoopoopoina

VAEGA VI
FAIGA FAAVAE O TULAGA
FAATAUVA

25. Galuega tauave ma tiute tauave o le Pule Faatonu e faasino i faiga faatauva
26. Faatulagaga o kamupani tetele o lo o tuuina atu auauanga
27. O le Faaaogā sese o le tulaga iloga o kamupani o lo o tuuina atu auauanga
28. O Isi Faiga e Taofiofia ai Faiga Faatauva
29. Faia o Faaiuga i le Faaaogā Sese o le tulaga iloga o kamupani ma Faiga e Taofiofia ai Faiga Faatauva
30. Auala e Foia ai le Faaaogā Sese o le tulaga iloga o kamupani ma Faiga e taofiofia ai Faiga Faatauva
31. Faasee ese atu o le Vaaia o kamupani o lo o Tuuina atu Auauanga

VAEGA VII
FETAULAIGA O LAINA TAU
FESOOTAIGA

32. Galuega tauave ma Tiute Tauave a le Pule Faatonu e faatatau i Fetaulaiga o Laina Tau Fesootaiga
33. Sootaga o Fetaulaiga o Masini tau Fesootaiga a Kamupani e Tuuina atu Auauanga
34. Sootaga o Fetaulaiga o Masini tau Fesootaiga a Kamupani Iloga e Tuuina atu Auauanga

35. Talosaga mo Sootaga o Fetaulaiga o Masini tau Fesootaiga
36. Tau Faaee atu o sootaga tau Fesootaiga
37. Aiaiga aloaia o sootaga o masini tau fesootaiga
38. Lomia o Feagaiga tau Fesootaiga i totonu
39. O le lē tausisia o tau sootaga o fetaulaiga o masini o fesootaiga

VAEGA VIII
FAASOLOGA O TAU

40. Faatoai o Fasologa o Tu ma Faamaoniga
41. Lomia Faasalalau o Faasologa o Tau
42. Faasologa o tau mo Auaunaga i Isi kamupani e Tuuina atu Auaunaga
43. Taiala Faalauaitele mo Tulafono Faatonutonu o Faasologa o Tau
44. Suesuega e faia i tau
45. Auala o le Faatonutonuina o tapulaa maualuga o tau

VAEGA IX
FAIĀ A KAMUPANI O LO O
TUUINA ATU AUAUNAGA
MA TAGATA O LO O
FAAAOGĀINA AUAUNAGA

46. Faaaogāina
47. Faiga sagatonu e tagofia ai mataupu

- 48. Agatapuaia o Faamatalaga e faasino i Tagata o lo o Faaaogāina Auaunaga
- 49. Agatapuaia o Fesootaiga e faasino i Tagata o lo o Faaaogāina auauanaga
- 50. Puipuia o Faamatalaga tau le tagata lava ia
- 51. Avanoa e maua e Pulega a le Malo
- 52. Faitioga a Tagata o lo o Faaaogāina Auaunaga
- 53. E leai se Faailoga tagata e le faavaea
- 54. Tuutuuga o Auaunaga
- 55. Faamatalaga e uiga i Tuutuuga o Auaunaga
- 56. Tusi Telefoni
- 57. Tulaga Aupito Manaomia o Auaunaga
- 58. Avanoa i Nofoaga o Tagata o lo o Faaaogāina Auaunaga
- 59. Noataga, Tupe toe faafoi ma Taui

VAEGA X
MEAFAIGALUEGA TAU
FESOOFTAIGA

- 60. Meafaigaluega tau Fesootaiga

VAEGA XI
FUAINUMERA

- 61. Fuafuaga mo le Faanumeraina i totonu o le Atunuu
- 62. Faaaogāina o Fuainumera
- 63. Feaveaia o Numera
- 64. Filifiliga o Kamupani o lo o tuuina atuaunaga

VAEGA XII
AVANOA I MEATOTINO

- 65. Avanoa i Eleele, Nofoaga & Hale o le Malo
- 66. Avanoa i Fanua Tumaoti ma Nofoaga
- 67. Avanoa i Fanua Faaleaganuu ma Nofoaga ma Hale
- 68. Faatutuina faatasi

VAEGA XIII
UIPUIGAMALU MO LE
ATUNUU MA
FAALAVELAVE FAAFUASEI
I TAGATA LAUTELE

- 69. Puipuigamalu o le Atunuu
- 70. Faalavelave Matuiā i le Atunuu ma le Tulaga o Faalavelave Faafuasei

VAEGA XIV
FEESEESEAIGA,
SOLITULAFONO MA
VAEGA FAAMAMALUINA

- 71. Feeseeseaiga i le va o Kamupani o lo o tuuina atuaunaga
- 72. Feeseeseaiga a Tagata o lo o faaaogāina auauanaga
- 73. Se isi Faaiauga e mafai ona foia ai Feeseeseaiga
- 74. Solitulafono tau Fesootaiga televavave ma Solitulafono tau Komepiuta
- 75. Isi Solitulafono ma Faasalaga
- 76. Tulaga Faamamaluina Faalefaamasinga
- 77. Mataituina ma le Faamamaluina
- 78. Noataga tau le va o Tagata
- 79. Puleaga faa-Faamasinga Sili ma le Faamasinga faa-Itumalo

<u>VAEGA XV</u>	
<u>AIAIGA ESESE</u>	
80. Puipuiga tau le va o tagata mo le Pule Faatonu	84. Teuteuga i Faamatalaga
81. Tulafono Faatonutonu	85. Aiaiga Faasaoina ma Aiaiga tau Soloaiga
82. Faamatalaga molimau e ala i Tusi Faamaonia	86. Aiaiga tau Soloaiga mo Laisene sa tuuina atu muamua
83. Faaooina atu o Faasilasilaga ma isi mea	Faamatalaga

2005, Nu.20

O SE TULAFONO e fausia ai se faavae faaletulafono o fesootaiga, ma ia soloia ma faalaugatasia ai nisi aiaiga o le Tulafono o Fale Meli 1972, le Tulafono o Galuega tau Meli ma Fesootaiga 1999 ma le Tulafono o Fale Meli ma Fesootaiga tau Komepiuta Faava o Malo 1997.

[29 Iuni 2005]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA I
FAATOMUAGA

1. Igoa puupuu ma le amataga-(1) E mafai ona taua lenei Tulafono o le Tulafono o Fesootaiga 2005.

(2) E tatau ona amata faamamaluina lenei Tulafono, i ona vaega uma po o na o ni vaega po o fuaiupu po o parakalafa i se aso po o ni aso ua filifilia e le Minisita.

(3) O le faasilasilaga o le amata faamamaluina o lenei Tulafono, i ona vaega uma po o na o ni vaega po o fuaiupu po o parakalafa, e tatau ona lomia faasalalau i le gagana Samoa ma le gagana Peretania i totonu o le Savali po o se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o lenei Tulafono, ae vagana ai e ese se uiga o manaomia e le mataupu:

“Tulafono” o lona uiga o le Tulafono o Fesootaiga 2005;
“sui auai” o lona uiga, pe afai e faasino i so o se tagata e toatasi, so o se isi tagata o lo o ona pulea tuusao pe e leai po o pulea e po o i lalo o le vaaiga tuusao pe leai i pulega a se tagata;

“auaunaga tau faasalalauga” o lona uiga o faasalalauga o leitio po o polokalame tau vito mo tagata lautele i luga o se faiga saoloto, totogi, saofaga po o isi auala, pe auala i televise e faaaogā ai uea, auala e ese ai ma auala e faaaogā i ai sateleelite, po o e ala i isi auala tau eletoroni o le faaooina atu o ia polokalame;

“laisene i vasega” o lona uiga o se laisene ua tuuina atu e tusa ai o fuaiupu 13 ma le 15 i se vasega ua faamatalaina o kamupani faamanino mai e tuuina atu auaunaga ma e faaaogā i se tagata o lo o i totonu o le vasega ua faamatalaina mai e aunoa ma le talosaga o lena tagata mo se laisene;

“aso e amata faamamaluina ai” o lona uiga o le aso po o aso e amata faamamaluina ai lenei Tulafono, i ona vaega atoa po o ni vaega po o fuaiupu po o parakalafa, e pei ona faamaoti i totonu o le fuaiupu 1(2);

“pulea” o lona uiga o le malosiaga e faatonu ai i gaoioiga a le isi tagata i so o se faiga, pe tuusao e ala i le umia o sea po o isi faamalumaluga po o feagaiga po o faatulagaga a o so o se ituaiga;

“poloaiga o tuusaunoaga” o lona uiga o se poloaiga ua faia e le Pule Faatonu e tusa ai o le fuaiupu 14;

“Malo” o lona uiga o le Malo o le Atunu Tutoatasi o Samoa;

“laisene taitasi” o lona uiga o se laisene ua tuuina atu e tusa ai o le fuaiupu 13 ma le 15 i se tagata e toatasi i luga o le talosaga a lena tagata;

“sootaga o fetaulaiga o masini o fesootaiga” o lona uiga o le sootaga faitino ma talafeagai o fetaulaiga tau fesootaiga ua faaaogāina e kamupani e tasi po o se isi kamupani o lo o tuuina atu auaunaga o kamupani e tasi po o se isi kamupani e tuuina atu auaunaga e fesootai ma tagata o lo o faaaogāina, po o e avanoa ai i nofoaga ma

ma/po o auaunaga a se isi kamupani, ma e aofia ai “avanoa” o lona uiga o le faaavanoa o nofoaga o fesootaiga po o auaunaga a se tasi o kamupani i se isi kamupani mo le faamoemoe o le tuuina atu o auaunaga; “laisene” o lona uiga o se laisene mo tagata taitasi po o se laisene i vasega ua tuuina atu e tusa ai o lenei Tulafono, ae le aofia ai se laisene o fetaulaiga o alaleo tau leitio po o se laisene sa tuuina atu a o lumanai le faamamaluina o lenei Tulafono;

“kamupani ua laiseneina” o lona uiga o se tagata o ia lea ua umia se laisene i lalo o lenei Tulafono;

“Minisita” o lona uiga o le Minisita e nafa mo Fesootaiga ma Faamatalaga Tekonolosi;

“Matagaluega” o lona uiga o le Matagaluega e nafa mo Fesootaiga ma Faamatalaga Tekonolosi;

“Ofisa o le Pule Faatonu” o lona uiga o le ofisa ua faavaeina i lalo o le fuaiupu 9;

“poloaiga” o lona uiga o se poloaiga tusitusia ua faia e le Pule Faatonu e tusa ai o lenei Tulafono, o se tulafono faatonutonu po o se tulafono faafoe;

“laisene sa tuuina atu muamua” o lona uiga o se faatagaga mo le faafoeina o se fetaulaiga o fesootaiga po o le tuuina atu o se auaunaga tau fesootaiga na tuuina atu a o lumanai le faamamaluina o lenei Tulafono;

“auaunaga tau telefoni mo tagata lautele” o lona uiga o le tuuina atu faapisinisi i tagata lautele o le faaooina o auaunagatuusao ma le kiina o telefoni i taimi e faaaogā ai i le va o kamupani o lo o tuuina atu auaunaga;

“laisene o fusi o alaleo o leitio” o lona uiga o se laisene ua tuuina atu e tusa ai o le fuaiupu 22;

“faamatalaga o tuutuuga o sootaga i masini tau fesootaiga” o lo o i ai le uiga ua faamatalaina i totonu o le fuaupu 37;

“tulafono faatonutonu” o lona uiga o se tulafono faatonutonu ua faia e tusa ai ma le Tulafono a le Matagaluega o Fesootaiga ma Faamatalaga Tekonolosi 2005;

“Pule Faatonu” o lona uiga o le tagata ua tofia e tusa ai o le fuaupu 6 ina ia faauluulu i ai le ofisa o le Pule Faatonu;

“tulafono faafoe” o lona uiga o se tulafono faafoe ua faia e le Pule Faatonu e tusa ai o lenei Tulafono;
“Samoa” o lona uiga o le Atunu Tutoatasi o Samoa;
“kamupani e tuuina atu auaunaga” o lona uiga o se tagata e tuuina atu auaunaga tau fesootaiga i tagata lautele po o lē e ona po o faafoeina se fetaulaiga o galuega tau fesootaiga ua faaaogāina e tuuina atu ai auaunaga tau fesootaiga i tagata lautele;
“meafaigaluega tau fesootaiga” o lona uiga o meafaigaluega ua fuafua e fesootai tuusao pe leai i se fetaulaiga o galuega tau fesootaiga ina ia auina atu, pe maua ai auaunaga tau fesootaiga;
“nofoaga ma fale tau fesootaiga” o lona uiga so o se nofoaga ma fale, meafaigaluega po o isi mea ia ua faaaogā po o e mafai ona faaaogā mo fesootaiga po o mo so o se faafoega ua fesootai tuusao ma fesootaiga;
“fetaulaiga o fesootaiga” o lona uiga soo se ueae, leitio, sootaga e vaaia e mata po o isi auala e faaaogā ai maneta ma le eletise mo le feaveaiina, kiina po le auina atu o auaunaga tau fesootaiga i le va o kamupani o lo o tuuina atu auaunaga;
“auaunaga tau fesootaiga” o lona uiga so o se ituaiga o feaveaina o faailoga, faailoilo, ituaiga tusitusiga, ata po o i si auala e faaaogā ai fetaulaiga o fesootaiga, ae le aofia ai se auaunaga tau faasalalauga;
“Tuutuuga o Auaunaga” o lona uiga o tuutuuga lautele ma aiaiga e tatau ona tuuina atu e se kamupani o lo o tuuina atu auaunaga i se tagata o lo o faaaogāina auaunaga ma o lo o faataoto mai i totonu o se pepa aloaia ua saunia e tusa ai o le Vaega IX o lenei Tulafono. O le taimi lava e faamaonia ai e le Pule Faatonu, e tatau i Tuutuuga o le Auaunaga, faatasi ma lenei Tulafono, o tulafono faatonutonu, tulafono faafoe, poloaiga ma faasologa o tau ua faamaonia, ona noatia i luga o se kamupani iloga ua tuuina atu auaunaga ma tagata o lo o faaagoaina lana auaunaga; ma
“Faaputugatupe e Faatino ai Avanoa Lautele” o lona uiga o le faaputugatupe ua faavaeina e tusa ai o le fuaiupu 21.

3. Sini o lenei Tulafono – O sini o lenei Tulafono o le:

- (a) faafaigofieina o le atinae o le vaega o fesootaiga ina ia siitia le atinae tau aga fesootai ma le tamaoaiga;
- (b) siitia le avanoa i auaunaga o fesootaiga lautele i tau gafatia;
- (c) siitia le tulaga atoatoa ma le faatuatuaina o le tuuina atu o auaunaga tau fesootaiga, e faalagolago i le faiga e aupito sili ona mafai i aga faamaketi, e pei o faiga faatauva ma le faafaigaluegaina o tupe i le vaega tumaoti;
- (d) siitia le faaaogāina o faamatalag ma tekonomosi aupito lata mai ma fou e faamalie ai manaoga o tagata Samoa;
- (e) uunaia le tulaga gafataulimaina o tupe teu faafaigaluegaina i totonu o le atunu ma fafo i le vaega o fesootaiga;
- (f) fausia se faavae mo le pulea o amio e taofiofa ai faiga faatauva;
- (g) siitia le tulaga o fetuunaiga atoatoa o sootaga o fetaulaiga o masini tau fesootaiga i le va o kamupani o lo o tuuina atu auaunaga;
- (h) puipuia o aia a tagata o lo o faaaogāina auaunaga tau fesootaiga ma isi tagata;
- (i) faamanino ma faamalamalama le faavae faale faalapotopotoga mo le atinae o faiga faavae ma le faatonutonuina o le vaega o fesootaiga, faapea ai ma le tuueseseina o faiga faavae a le Malo ma le galuega faatonutonu mai ia i latou o lo o tuuina atu auaunaga tau fesootaiga;
- (j) siitia le pulega atoatoa ma le faaaogāina o fusi o alaleo leitio ma isi punaoa utiuti;
- (k) faavaeina se pulega o laisene e sagatonu, le faaituau, manino mo kamupani e tuuina atu auaunaga;
- (l) faavae se pulega o faamaoniga atoatoa mo meafaigaluega o fesootaiga; ma
- (m) faavae sua faatatau e faamalosia ai le faatinoina o lenei Tulafono ma ia faasaina ai nisi ituaiga o

amio e feteenai ma le atinae sologa lelei ma le faatonutonuina o le vaega o fesootaiga.

4. Faaaogāina o lenei Tulafono-(1) E tatau ona noatia le Malo i lenei Tulafono.

(2) O lenei Tulafono e faaaogā i so o se gaoioiga po o faatinoga ua le faia po o se mea e tupu i totonu o Samoa po o so o se isi nofoaga.

5. Soloia o Tulafono – Ua soloia Tulafono po o vaega po o fuaiupu o Tulafono, ua tusia faasolo i le Faamatalaga.

VAEGA II O LE PULE FAATONU

6. Tofiaina o le Pule Faatonu – I le noatia ma le fai fuafua i fuaiupu 7 ma le 8 ma lenei fuaiupu:

(1) E tatau ona tofia e Le Ao o le Malo, faia i luga o le fautuaga a le Kapaneta, se Pule Faatonu o ia lea e tatau ona i ai ma faatino matafaioi, galuega tauave ma malosiaga ua faaee atu e lenei Tulafono ma so o se tulafono talafeagai.

(2) E tatau ona tofia le Pule Faatonu mo se vaitaimi e tolu (3) tausaga, lea e mafai ona toe faafou e Le Ao o le Malo, faia i luga o le fautuaga a le Kapaneta, mo vaitaimi faaopoopo e tolu (3) tausaga.

(3) E lē mafai ona aveesea le tofi o le Pule Faatonu mai se tagata ae le i maea le taimi e tolu (3) tausaga o le tofiga seia vagana o le tagata:

(a) i le taimi o le tofiga a o umia le tofi o le Pule Faatonu, o lo o i ai se moliaga ua faamaonia faaletulafono po o ua noatia i so o se solitulafono, i totonu o Samoa po o se isi nofoaga;

(i) e aofia ai le lē faamaoni ma aga tauvalea; po o

(ii) afai o le faasalaga mo sea solitulafono e aofia ai le nofo sala i le falepuipui mo le tausaga e tasi (1) pe sili atu (e tusa lava pe o sea faasalaga ua faia po o ua

faaeeina e tusa o lea moliaga faaletulafono);
po o

- (b) o se tagata gaumativa; po o
- (c) ua fuafuaina e se fomai e faapea e lē o mafai ona faatino matafaioi, galuega tauave, tiute tauave ma malosiaga o le Pule Faatonu, ona o so o se aafiaga i le tino po o le mafaufau ma lē mafai ai; po o
- (d) solia le Tulafono Laitiiti o Amio e pei ona auiliiliina i totonu o le fuaiupu 19 o le Tulafono o Galuega a le Malo 2004.

(4) E mafai e Le Ao o le Malo, faia i luga o le fautuaga a le Kabeneta, ona tofia le Minisita po o se isi tagata na te faataunuina matafaioi, galuega tauave ma malosiaga ua faaeeina i ai e lenei Tulafono ma so o se isi tulafono talafeagai i le Pule Faatonu, po o i luga o ni faiga lē tumau, a o faagasolo:

- (a) le vaitaimi e oo atu i le tofiaina o le uluai Pule Faatonu;
- (b) so o se vaitaimi ina ua tuanai ai ona le toe umia e le Pule Faatonu tofi ma a o lumanai ai le tofiaina o se tagata e suitulaga; ma
- (c) se vaitaimi lē tumau e toesea ai po o ua le mafai ona faataunuina galuega a le Pule Faatonu.

(5) E mafai e le tagata ua tofia i lalo o le faafuaiupu (4) ona faataunu matafaioi uma, galuega tauave ma malosiaga ua faaeeina atu i le Pule Faatonu e lenei Tulafono ma so o se tulafono talafeagai e ui lava i so o se isi aiaiga o lenei Tulafono.

(6) E lē mafai ona faaaauauina se tofiga ua faia i lalo o le faafuaiupu (4) mo se vaitaimi e silia i le ono masina.

7. Tauleagavaaina-(1) I le noatia ma le fai fuafua i lenei fuaiupu, e lē agavaa se tagata i le tofia po o le faaaauau e avea o se Pule Faatonu po o e avea o se sui auai o se aufaigaluega o agavaa faapitoa a le Pule Faatonu pe afai o lea tagata, i se faiga tuusao po o se faiga lē tuusao, i le avea o ia o se tagata e umia, tagata fai sea, faatonu, tagata ofisa, paaga po o se isi tulaga e ese ai, o lo o i ai sona aiā tau tupe po o aiā a tagata e umia i:

- (a) se tagata na te tuuina atu auauanaga; po o

(b) se tagata na te gaosia pe na te tuuina atu meafaigaluega mo fesootaiga, vagana pe afai o le tuuina atu o ia mea e ono tulai mai i le faatauina atu o oloa i oloa siiatoa pe faatauina i oloa laiti.

(2) Afai o so o se aia ua faasaina i le faafuaiupu (1) ua faaeeina atu i le Pule Faatonu po o se sui auai o se aufaigaluega o agavaa faapitoa i le loto i ai po o mo le suitulaga atu mo le manuia o le Pule Faatonu po o sui auai o le aufaigaluega agavaa faapitoa, i le a lava le tulaga e mafai ai, e tatau ona faaaogaina atoatoa sea aiā i totonu o masina e tolu (3) sa faapea ona faaeeina atu ai, ma afai o le a lē mafai ona usitaia le faia e tusa ai ma lenei fuaiupu e tatau i le Pule Faatonu po o se sui o le aufaigaluega tomai faapitoa, i le tulaga e mafai ona manaomia ai, i le noatia i lalo o le faafuaiupu (1).

(3) Mo faamoemoega o lenei fuaiupu:

(a) e tatau ona aofia i aiā tau tupe po o aiā e umia ai, a e lē faatapulaaina ai i aiā tau tupe ma aiā e umia ai o lo o i le toalua, po o se matua, po o se fanau po o uso po o tuafafine o le Pule Faatonu po o se tagata faigaluega o le aufaigaluega tomai faapitoa i le a lava le tulaga e mafai ona manaomia ai; ma

(b) e tatau ona avea ma tagata faigaluega o le aufaigaluega tomai faapitoa a le Pule Faatonu so o se tagata o le aufaigaluega a le Pule Faatonu ua filifilia ai i sea tulaga e le Pule Faatonu e avea o se vaega o ia tagata po o tagata taitoatasi, po o ia itu uma e lua.

8. Matafaioi, galuega tauave ma Malosiaga a le Pule Faatonu -(1)

E tatau i le Pule Faatonu ona:

(a) fautuaina le Minisita i faiga faavae mo le vaega o fesootaiga;

(b) faatino lenei Tulafono, o tulafono faatonutonu ma isi mataupu patino faaletulafono ma tulafono faatonutonu o le faavae faataatia o vaega o fesootaiga;

- (c) tuuina atu laisene o tagata taitoatasi ma vaega, ma fuafua ma faagaoioi taualumaga mo le tuuina atu o ia laisene;
- (d) mataitu ma faamalosia le usitaia e tagata e umia laisene o tuutuuga o a latou laisene;
- (e) faafou pe soloia laisene ina ia tusa ai ma lenei Tulafono faapea tulafono faatonutonu;
- (f) faamatala tulaga e muta ai fesootaiga, pe afai e manaomia mo le faaliliuina tatau ma le pulea lelei o lenei Tulafono, o tulafono faatonutonu ma tulafono faafoe;
- (g) faatonuina taualumaga mo le faamaoniga o meafaigaluega mo fesootaiga mo le faaaogāina faatasi ma auala o fesootaiga i totonu o Samoa, e faaaogāina ai auala aupito i laititi faafitali ua mafai ona maua, e faapea ai o faamaoniga o meafaigaluega sa faamaonia muamua mo le faaaogāina i atunu po o itulagi ua faamaotiina mai;
- (h) fausia se fuafuaga o fusi o alaleo o leitio ma pulea fusi o alaleo o leitio mo le vaega o fesootaiga;
- (i) faatonutonu faaletulafono sootaga o fetaulaiga o masini tau fesootaiga;
- (j) fausia ma pulea se fuafuaga o fuainumera ma tuuina atu fuainumera i kamupani o lo o tuuina atu auauanaga;
- (k) foia feeseseaiga i le va o kamupani o lo o tuuina atu auauanaga, ma le va o tagata o lo o faaaogāina le auauanaga ma ia kamupani;
- (l) faaofi ma tausia faiga talafeagai mo le faamoemoe i le taofiofia o le avea o kamupani iloga o lo o tuuina atu auauanaga tau fesootaiga mai le auai po o le faaauauina o le taofiofia o faiga faatauva;
- (m) avea ma sui o Samoa i faalapotopotoga o fesootaiga faava o malo, i tulaga pe afai e filifilia e le Minisita le Pule Faatonu o ia lea o le sui talafeagai;
- (n) tauave so o se matafaioi, galuega tauave ma malosiaga ua tuuina atu i le Pule Faatonu i so o

se polokalame aoao e maua ai fesootaiga po o se faatulagaga ua faavaeina e tusa ai ma le Vaega IV o lenei Tulafono;

- (o) tausia o faamaumauga tusitusia o laisene ma tusi talosaga mo laisene, faamaoniga o meafaigaluega ma tusi talosaga faapea ai maliega tau fesootaiga ma, ae vagana pe afai ua manatu le Pule Faatonu ua tonu mo mafuaaga i mataupu faapisinisi ua puipuia, ona faia pepa aloaia i ia faamaumauga e avanoa ai i tagata lautele;
- (p) lomia faasalalau taualumaga, taiala ma faauigaga ina ia faafaigofie ai le faatinoga o lenei Tulafono;
- (q) faia tulafono faafoe mo mataupu ia o lo o mafaufauina e pe talafeagai ai mo le faamamaluina atoa o aiaiga o lenei Tulafono ma le faafoeina tatau o ia vaega e le Pule Faatonu;
- (r) faia poloaiga e tusa ai o so o se mataupu po o se mea o lo o i totonus o le pulega a le Pule Faatonu i lalo o lenei Tulafono, se tulafono faatonutonu po o se tulafono faafoe, e aofia ai poloaiga e faamalosia ai se tagata ina ia usitaia pe faatino faamoemoega o lenei Tulafono, se tulafono faatonutonu, tulafono faafoe po o laisene, ma, i luga o se lomiga faasalalau a le Pule Faatonu e tatau ona tutusa le faamamaluina faaletulafono o ia poloaiga ma se tulafono faafoe;
- (s) i luga o le lotofuatiaifo o le Pule Faatonu po o i luga o se talosaga a se isi tagata, ona suesue faitioga e faasaga i kamupani ua laiseneina po o isi kamupani o lo o tuuina atu auauunaga, ma faia isi ia suesuega e pei ona manatu le Pule Faatonu ua alagatatau ina ia usitaia lenei Tulafono, o se tulafono faatonutonu, tulafono faafoe po o poloaiga, ma tuuina atu se poloaiga e tusa ai o so o se mea ua faasaina, manaomia pe faatagaina ina ia faia i lalo o lenei Tulafono, se tulafono faatonutonu, tulafono faafoe po o se poloaiga;

- (t) usitaia le Tulafono Laitiiti o Amio o lo o auiliiliina i totonu o le fuaiupu 19 o le Tulafono o Galuega a le Malo 2004;
- (u) i le faatinoina o malosiaga ma tiute tauave o le Pule Faatonu i lalo o lenei Tulafono, o se tulafono faatonutonu po o se tulafono faafoe, ua fuafuaina i so o se fesili o le tulafono po o se faamatalaga moni, ma e ui lava i so o se isi tulafono, o le fuafuaina e le Pule Faatonu i luga o se fesili o se faamatalaga moni e noatia ma mautu mo faamoemoega uma, e aofia ai ae le faatapulaaina i so o se taualumaga i so o se Faamsinoga, Komisi Faufautua po o se isi faalapotopotoga faafaamsinoga; ma
- (v) faia nisi gaoioiga e pei ona manaomia i tulaga talafeagai mo le faatinoga o lenei Tulafono, o tulafono faatonutonu ma tulafono faafoe ma ina ia faatino isi ia matafaioi i galuega tauave ma malosiaga ua faaee atu i le Pule Faatonu i lalo o so o se isi tulafono.

(2) E tatau i le Pule Faatonu ona ia faatino matafaioi, galuega tauave ma malosiaga a le Pule Faatonu faatasi ma se manatu i le faatinoina o sini ua faatulaga mai i totonu o le fuaiupu 3 o lenei Tulafono.

(3) E tatau ona galue tutoatasi le Pule Faatonu i le faatinoina o matafaioi i galuega tauave ma malosiaga o le Pule Faatonu o lo o faatulaga mai i totonu o lenei Tulafono ma isi tulafono, ma ona o lea itu:

- (a) e tatau ona galue le Pule Faatonu i se faiga e ese mai, ma e le tali atu i, so o se kamupani o lo o tuuina atu auaunaga, e aofia ai se kamupani o lo o tuuina atu auaunaga e umia e le Malo;
- (b) o poloaiga ma tulafono faafoe ua faia ma taualumaga ua faaaogāina e le Pule Faatonu e tatau ona le faaituau e tusa ai o kamupani uma o lo o tuuina atu auaunaga ma isi maketi, vagana ai e faapea e leai se mea i totonu o lenei fuaiupu e tatau ona faamatalaina e taofia ai le Pule Faatonu mai le:

(i) feutagai ma so o se tagata po o faalapotopotoga i so o se mataupu e faasino i matafaioi, galuega tauave ma malosiaga a le Pule Faatonu; po o

(ii) faia o se faaiuga ina ia tusa ai ma lenei Tulafono peitai o lo o faapea ona i ai se eseesega po o se faaiuga pito tasi i luga o se kamupani o lo o tuuina atu auauanaga po o se isi maketi.

9. Ofisa o le Pule Faatonu - (1) Ua faavae nei se Ofisa o le Pule Faatonu, lea e tatau ona faagaoioi ina ia tusa ai ma lenei fuaiupu.

(2) E tatau i le Pule Faatonu ona nafa ma le pulega o le Ofisa o le Pule Faatonu.

(3) E tatau ona aofia ai i le Ofisa o le Pule Faatonu le Pule Faatonu, le aufaigaluega a le Ofisa o le Pule Faatonu ma tagata faigaluega ma nisi tagata e ono faafaigaluega pe tofia ina ia tusa ai ma lenei fuaiupu.

(4) Vagana ai ua aiaia i totonu o lenei Tulafono, e tatau ona galulue le Pule Faatonu ma le Ofisa o le Pule Faatonu e tusa ai ma tulafono o lo o pulea ai galuega a le Malo ma tupe a le Malo o Samoa, ma aemaise ai:

(a) o le aufaigaluega ma tagata faigaluega o le Ofisa o le Pule Faatonu e tatau ona tofia pe faafaigaluega i lalo o le Tulafono o Galuega a le Malo 2004;

(b) e tatau i le Komisi o Galuega a le Malo ona tofia lea aufaigaluega ma ia tagata faigaluega i luga o le fautuaga a le Pule Faatonu; ma

(c) o le tala o le tupe a le Ofisa o le Pule Faatonu e tatau ona faamaonia e tusa ai o taualumaga aoao o tala o tupe a le atunu mo le Malo i le amanaia ai o so o se totogifuaupauina ua aoina e tusa ai o se tulafono faatonutonu ua faia i lalo o le fuaiupu 10 (1) ma le (3).

(5) E mafai e le Minisita, i lona faia i luga o le fautuaga a le Ofisa Sili o Pulega o le Matagaluega ma le Pule Faatonu, i se faasilasilaga tusitusia ona:

- (a) lautogia se tagata e toatasi pe sili atu ua faafaigaluegaina e le Matagaluega po o isi Matagaluega po o Faalapotopotoga a le Malo ina ia galue faatasi ma le Ofisa o le Pule Faatonu i luga o se tulaga o le faafaigaluegaina i se faiga faapitoa. E mafai ona faigaluega le tumau faavaitaimi po o le taimi atoa, ma e tatau ona ausia i lea vaitaimi taimi e pei ona faailoa atu i le faasilasilaga; ma
- (b) fuafuaina e faapea e mafai e le Ofisa o le Pule Faatonu ona faasoa pe faaaogā i se isi tulaga e ese ai le aufaigaluega lagolago, fale ma nofoaga o le ofisa ma isi punaoa o le Matagaluega, po o se isi faalapotopotoga a le Malo.

(6) O se tagata o ia lea ua tofia pe faigaluega le tumau i le Ofisa o le Pule Faatonu ma o ia foi lea ua tuuina atu i ai e le Pule Faatonu se matafaioi po o se galuega tauave po o malosiaga i se faiga tusitusia, e tatau ona ia faatino ia matafaioi, galuega tauave ma malosiaga a le Pule Faatonu, e pei ona faamaoti mai i le tuuina atu o malosiaga, ma e mafai i le tuuina o malosiaga i lalo o lenei faafuaiupu ona:

- (a) faataga se tagata ina ia faia poloaiga pe tuuina atu laisene;
- (b) faatapulaa le tuuina atu o malosiaga i ituaiga mataupu maoti po o i se vaitaimi maoti;
- (c) ina ia noatia ma fai fuafua i tuutuuga ma aiaiga po o tapulaa; ma
- (d) ina ia faaleaogāina e ala i se faasilasilaga tusitusia.

(7) E faaopoopo atu i tagata ua tofia pe faafaigaluega i le Ofisa o le Pule Faatonu i lalo o lenei fuaiupu, e mafai e le Pule Faatonu ona tofia ia faufautua e pei ona alagatatau ai mo le faatinoina i le tulaga aupito manaomia o galuega tauave a le Pule Faatonu.

(8) E tatau i tagata uma ua tofia pe faafaigaluega i se tulaga faapitoa i lalo o lenei fuaiupu ona galulue i lalo o le faatonuga a le Pule Faatonu i le faatinoina o a latou galuega tauave, malosiaga ma tiute tauave.

(9) E tatau i le Pule Faatonu ona faafoe mataupu a le Ofisa o le Pule Faatonu i se faiga saoloto ma manino. Ona o lenei

tulaga, e tatau i le Pule Faatonu, mai lea taimi i lea taimi, ona lomia faasalalau, faasilasilaga, tulafono faafoe ma taualumaga o lo o pulea ai le faafoeina o le Ofisa o le Pule Faatonu ma feutagaiga a le Ofisa ma tagata lautele.

(10) E tatau i le Pule Faatonu ona faapogai i le faatuina e le Ofisa o le Pule Faatonu se tuatusi faakomepiuta aloaia ina ia faatupulaia ai le tulaga manino o mataupu a le ofisa i tagata i totonu ma fafo atu o Samoa.

(11) O tulafono faafoe uma, poloaiga, faasilasilaga ma isi pepa aloaia taua e tuuina atu e le Ofisa o le Pule Faatonu e uiga i tulafono faatonutonu a le vaega o fesootaiga e tatau ona tuuina i totonu o le tuatusi aloaia faakomepiuta a le Pule Faatonu, ma lomia faasalalau i so o se auala tau faasalalauga lea ua manatu le Pule Faatonu ua alagatatau ai pe talafeagai i le tuuina atu o faasilasilaga atoatoa i tagata e aia i ai.

(12) I totonu o le ono (6) masina ina ua tuanai ai le aso 30 o Iuni o tausaga taitasi e tatau i le Pule Faatonu ona faapogai i le saunia e le Ofisa o le Pule Faatonu ma tuuina atu i le Minisita se lipoti faaletausaga o galuega e le Ofisa o le Pule Faatonu, o sea lipoti o le aofia ai:

- (a) se otootoga o gaoioiga a le Ofisa o le Pule Faatonu;
- (b) faamatalaga ma faamaumauga tau tupe ma lipoti a suetusi i ia faamatalaga ma faamaumauga tau tupe (e aofia ai le Faaputugatupe mo Avanoa Lautele) i se faiga ua faamaonia e po o i lalo o le faatonuga ma le faafoega a le Pule ma Suetusi Sili;
- (c) se lisi o le faasologa o laisene ua faamamaluina ma tuuina atu;
- (d) se lisi o feagaiga o sootaga o fetaulaiga o masini tau fesootaiga ua faatoai atu i le Pule Faatonu;
- (e) se otootoga o mataupu faafaamasinoga e aafia ai le Pule Faatonu;
- (f) se lipoti o le Faaputugatupe Avanoa Lautele;
- (g) se otootoga o tulafono faafoe ma poloaiga iloga ua faia i le vaitaimi talu le lomiga faasalalau o le lipoti faaletausaga mulimuli talu ai;

- (h) se faamatalaga o gaoioiga autu o faatauga o oloa ma le mauaina mai konekarate e faatinoina e le Pule Faatonu;
 - (i) se lisi o le faasologa o le aufaigaluega, tagata faigaluega ma tagata faufautua ua tofia pe faafaigaluega i se tulaga faapitoa i le ofisa o le Pule Faatonu; ma
 - (j) isi faamatalaga e pei ona mafai e le Minisita ona fuafua e ala i se faasilasilaga tusitusia;
- (13) E tatau i le Minisita ona faataatia i luga o le Laulau-a-Fono a le Palemene se lipoti faaletausaga i le uluai avanoa e mafai ona maua.

10. Laisene, o fusi o alaleo tau leitio ma totogifuapauina ua laisene, fusi o alaleo ma numera-(1) E mafai e le Pule Faatonu ona fuafua se tulafono faatonutonu e faavae ai:

- (a) totogifuapauina o laisene, e aofia ai totogifuapauina o talosaga mo laisene ma totogifuapauina faaletausaga o laisene;
 - (b) totogifuapauina o le faaaogāina o fusi o alaleo o leitio; ma
 - (c) totogifuapauina mo le faaaogāina o numera o telefoni.
- (2) O totogifuapauina ua aiaia i totonu o le faafuaiupu (1) o le a lē tatau ona faamamaluina seia maea ona tuuina atu le maliega a Le Ao o le Malo, faia i luga o le fautuaga a le Kabeneta, i se tulafono faatonutonu e faavae ai totogifuapauina ma tupe totogi faapea ma taualumaga tau pulega.

(3) E mafai e se tulafono faatonutonu ua faia i lalo o lenei fuaiupu ona aiaia ai e faapea o totogifuapauina mo laisene ma totogifuapauina mo le faaaogāina o fusi o alaleo o leitio faapea numera o telefoni e tatau ona aoina mai kamupani uma ua laiseneina ma ia faitaulia ai aiaiga autu o lo o taua e faapea:

- (a) e mafai ona faaaogāina ia totogifuapauina e faatupeina i lona atoaga po o i se vaega, matafaioi, galuega tauave ma malosiaga o le Pule Faatonu ma galuega a le Ofisa o le Pule Faatonu i lalo o lenei Tulafono ma isi tulafono;

- (b) o le faatupeina o le Pule Faatonu ma le Ofisa o le Pule Faatonu e ono mafai ona faia i faiga lē tuusao, faatasi ai ma totogifuapauina e mafai ona totogi i le taimi muamua i le Faaputugatupe a le Ofisa o Tupe, ma ia faapena ona fataulia e le Matagaluega o Tupe i le faatupeina o le tala o tupe a le Pule Faatonu e ala i le faiga masani o tala o tupe a le Malo;
 - (c) e tatau ona totogi e kamupani eseese ua laiseneina ma i latou e faaaogāina alaleo ma numera i se tulaga faatauva e le faaituau; ma
 - (d) e mafai ona faatulaga totogifuapauina o laisene i se pasene o tupe maua a kamupani ua laiseneina mai le tuuina atu o a latou auaunaga tau fesootaiga ua laiseneina.
- (4) O totogifuapauina e ao ona totogi i lalo o lenei fuaiupu ua faavae ai se aitalafu i le Malo ma e mafai ona toe faaola mai i se faamasinoga aloaia.

11. Talosaga tetee ma le toe Iloiloina o Poloaiga a le Pule Faatonu-(1)

E faatoa mafai ona faia se talosaga tetee mai se poloaiga a le Pule Faatonu:

- (a) i luga o so o se mataupu o le tulafono; ma
 - (b) i le Faamasinoga Sili i luga o le pule a lea Faamasinoga.
- (2) O se tusi talosaga mo se faatagaga e talosaga tetee ai e tatau ona faia i totonu o le tolusefulu aso ina ua tuanai ai le aso o le poloaiga ua faia ai le talosaga.
- (3) E tatau ona aumai se talosaga tetee i totonu o le onosefulu aso ina ua tuanai le aso lea na tuuina atu ai le faatagaga e talosaga tetee ai.
- (4) I luga o se talosaga tetee i lalo o lenei fuaiupu e mafai e le Faamasinoga Sili ona aumai so o se faauigaga e faapea o lo o ogatasi ma sailiiliga o le faamatalaga moni ua faia i totonu o le poloaiga.
- (5) E ui lava i so o se isi tulafono, i le fofogaina o le talosaga tetee i lalo o lenei fuaiupu na o le Faamasinoga Sili e i ai le puleaga faa-faamasinoga ma le malosiaga:
- (a) e fuafua ai le tulafono talafeagai; ma/po o

- (b) e faaalia manino o le poloaiga lea e mafua ai talosaga tete, po o vaega o le poloaiga, ua tusa ai ma le tulafono po o le lē tusa ai ma le tulafono; ma/po o
- (c) e toe faafoi le poloaiga i le Pule Faatonu mo se isi fuafuaga a le Pule Faatonu ina ia tusa ai ma so o se faaiuga ua faia ma/po o se faaaliga manino ua faia i lalo o parakalafa (a) ma/po o (b).

VAEGA III
LAISENE MO FESOOOTAIGA

12. Manaoga ina ia umia le Laisene-(1) E lē tatau i se tagata:

- (a) ona tuuina atu se auaunaga o fesootaiga i tagata lautele mo taui tuusao pe lē tuusao; po o
 - (b) e umia pe faagaoioia se fetaulaiga tau fesootaiga e faaaogaina e tuuina atu ai se auaunaga tau fesootaiga i tagata lautele mo se taui tuusao pe lē tuusao,
vagana ai i lalo ma ina ia tusa ai ma se laisene po o se poloaiga e tuusaunoa ai ua tuuina atu e le Pule Faatonu.
- (2) Mo faamoemoega o lenei fuaiupu:
- (a) o tagata lautele e aofia ai tagata i totonu o Samoa po o isi nofoaga; ma
 - (b) o le tuuina atu o auaunga tau fesootaiga i tagata lautele e aofia ai le tuuina atu po o le ofoina o sea auaunaga i so o se vaega o tagata lautele, e aofia ai le toe faatau atu o auaunaga tau fesootaiga na maua mai i se isi tagata, tusa lava pe na o le toatasi le tagata sa tuuina atu i ai pe sa ofoina atu i ai sea auaunaga.
- (3) O auaunaga tau fesootaiga ma fetaulaiga tau fesootaiga, e ese mai nai lo ia o lo o faamatalaina i le faafuaiupu (1), e mafai ona tuuina atu e aunoa ma se laisene.

13. Aiaiga Lautele e Faasino i Laisene-(1) E tatau ona tuuina atu e le Pule Faatonu laisene, ma e tatau ona sainia e le

Pule Faatonu po o se tagata o ia lea ua tuuina i ai le pule faataga e le Pule Faatonu i lalo o le fuaiupu 9.

(2) O se laisene o le tuuina atu o le faatagaga toatasi mai le Pule Faatonu ina ia tuuina atu auauunaga tau fesootaiga pe faagaoioia ai se fetaulagai tau fesootaiga, ma mo faamoemoega uma e le tatau ona avea o se konekarate po o se maliega a ni vaaega e lua.

(3) E tatau ona tusitusia laisene, ma e tatau i le Pule Faatonu ona faia ata o ia laisene ina ia avanoa mo asiasiga e tagata lautele.

(4) I tulaga uma e aofia ai pe afai ua manaomia se laisene, e tatau i le Pule Faatonu ona faalauaitele le avanoa mo vaega e faapea:

- (a) o taualumaga o le laiseneina ma aiaiga mo le laiseneina; ma
- (b) le vaitaimi masani e manaomia e maua ai se faaiuga e faatatau i se talosaga o se laisene.

(5) E tatau ona tuuina atu mafuaaga mo le teena o se laisene i se faiga tusitusia e le Pule Faatonu i se tagata talosaga i luga o se talosaga.

(6) O laisene mo kamupani o lo o tuuina atu auauunaga tau fesootaiga tutusa pe umia pe faagaoioia ia fetaulaiga o fesootaiga tutusa e le tatau ona faia i ai se faiga faailoga tagata le sagatonu.

(7) E mafai e le Pule Faatonu ona tuuina atu laisene i lalo o le faafuaiupu (1) e ui lava:

- (a) i so o se tulafono, e aofia ai ae le faatapulaaina i lenei Tulafono, le Tulafono o Fale Meli 1972 ma le Tulafono o Galuega Tau Meli ma Fesootaiga 1999; po o
- (b) so o se maliega, konekarate, faatulagaga, laisene po o isi aiaiga o lo o i ai i le aso e amata faamamaluina ai.

(8) Afai:

- (a) ua tuuina atu e le Pule Faatonu se laisene i lalo o le faafuaiupu (1); ma
- (b) ua fautuaina e le Loia Sili ma le Ofisa Sili o Pulega o le Matagaluega o Tupe le Kapaneta i se faiga tusitusia e faapea o le tuuina atu o sea laisene ua

tulai mai ai se aafiaga o aia tatau a se vaega i lalo o se feagaiga, konekarate, faatulagaga, laisene po o isi aiaiga o lo o i ai i le taimi nei,
e mafai e Kapaneta, i lona lava faitalia maumaututu, ona faataga le tuuina atu o taui i sea vaega e ala i ni tupe, tau pa'ū faameaalofa, faamanuiaga po o i se faiga e ese ai i se aofaiga ma/po o se faiga e mafai ona fautuaina i se tusitusiga e le Loia Sili ma le Ofisa Sili o Pulega o le Matagaluega o Tupe.

14. Poloaiga mo Tuusaunoaga-(1) E mafai e le Pule Faatonu ona tuuina atu se poloaiga (“Poloaiga mo Tuusaunoaga”) e tuusaunoa ai gaoioiga maoti po o ni vasega o tagata mai manaoga e umia ai se laisene.

(2) E mafai ona faia se poloaiga mo tuusaunoaga i le noatia ma le fai fuafua i tuutuuga e pei ona manatu ai le Pule Faatonu ua alagatatau ma ua ogatasi ma lenei Tulafono, tulafono faatonutonu ma tulafono faafoe.

15. Ituaiga o Laisene-(1) E mafai e le Pule Faatonu ona tuuina atu ni ituaiga se lua o laisene:

- (a) laisene taitoatasi; ma
- (b) laisene o vasega.

(2) E tatau i tulafono faafoe ona faamaoti mai ai ituaiga o auauanga tau fesootaiga e manaomia ni laisene taitoatasi ma laisene o vasega. A o le i oo ina faamamaluina lea tulafono faafoe, e mafai e le Pule Faatonu ona tuuina atu se poloaiga e faatonuina ai o le fea le ituaiga o auauanga tau fesootaiga mamao e manaomia ai laisene taitoatasi ma laisene o vasega.

16. Taualumaga o le Laiseneina-(1) E tatau ona sagatonu ma lē faaituau taualumaga mo le tuuina atu o laisene.

(2) E tatau i taualumaga ma aiaiga faavae mo le tuuina atu o laisene ona:

- (a) lomia faasalalau i le gagana Samoa ma le gagana Peretania i totonu o le Savali ma se isi nusipepa o lo o faasalalauina i totonu o Samoa; ma
- (b) tuuina i le tuatusi faakomepiuta aloaia a le Pule Faatonu.

17. Tuutuuga o Laisene-(1) E tatau i le Pule Faatonu ona faavaeina tuutuuga mo laisene uma.

(2) E tatau ona tausia tuutuuga o laisene i se faiga aupito tuuitiitia ma e faatoa faaaogā pe afai ua le mafai i tulafono faafoe o le faaagoaina lautele ona tuuina atu atoa se faafoega e faatonutonu ai lea ua manatu le Pule Faatonu ua alagatatau mo le faatinoina o lenei Tulafono.

18. Teuteuga ma le Faalēaogaina o Laisene-(1) E mafai e le Pule Faatonu ona teuteu pe faalēaogā se laisene pe afai:

- (a) o le teuteuga po o le faalēaogaina o laisene ua talosagaina po o ua malie i ai le kamupani ua laiseneina; po o
 - (b) ua solia e le kamupani ua laiseneina tuutuuga autu o se laisene po o lenei Tulafono po o se tulafono faatonutonu, tulafono faafoe po o se poloaiga ua faia i lalo o lenei Tulafono; po o
 - (c) o suiga i feagaiga faava o malo, noatiaga, fautuaga, tulaga aloaia po o tulafono a Samoa e manaomia ai se teuteuga po o le faaleaogaina; po o
 - (d) ua faia e le Pule Faatonu se faaiuga e faapea o le teuteuga po o le faalēaogaina ua manaomia ina ia faatino ai lenei Tulafono i se faiga e ogatasi ma sini ua tusia faasolo i totonu o le fuaiupu 3.
- (2) A o lumanai ai le teuteuina po o le faalēaogaina o se laisene e tusa ai o lenei fuaiupu, e tatau i le Pule Faatonu ona logoina le kamupani ua laiseneina i se faiga tusitusia e faapea ua iloiloina e le Pule Faatonu se gaoioiga talafeagai, ma e tatau ona iloilo so o se manatu na faia e le kamupani ua laiseneina i se taimi ua talafeagai lelei.
- (3) Faasilasilaga i lalo o le faafuaiupu (2):
- (a) e tatau ona tuuina atu i se kamupani ua laiseneina le taimi e le ititi ifo ma le 14 aso mai le faaooina atu o le faasilasilaga ina ia saunia ai manatu faaalia i luga o gaoioiga talafeagai.
 - (b) e tatau ona faatulaga mai ai so o se taualumaga o le a faaaogaina e le Pule Faatonu i le iloiloina o se gaoioiga talafeagai; ma

(c) e mafai ona tapaina ni manatu faaalia mai isi vaega o lo o i ai a latou aia po o tagata lautele.

(4) Afai ua teuteuina pe faalēaogāina e le Pule Faatonu se laisene e tusa ai o lenei fuaiupu, e tatau i le Pule Faatonu ona tuuina atu i le kamupani ua laiseneina se taimi talafeagai ina ia tausisia le teuteuga po o le faalēaogāina.

(5) Afai ua faalēaogāina se laisene, e tatau i le Pule Faatonu ona tausisia le faaauauina o auauanga i tagata o lo o faaaogāina auauanga ma ia aofia ai i totonu o le poloaiga e faalēaogāina ai tuutuuga ma aiaiga e pei ona manatu ai le Pule Faatonu ua talafeagai.

(6) Isi taualumaga e faasino i le teuteuga po o le faalēaogāina o se laisene e mafai ona faatulagaina i totonu o tulafono faafoe po o poloaiga.

19. Taimi e umia ai ma le toe faafouina o laisene-(1) E tatau ona taua le taimi e umia ai se laisene i totonu o le laisene.

(2) I le noatia ma le fai fuafua i le faafuaiupu (3), i luga o le talosagaina a le kamupani ua laiseneina, e tatau ona faafou se laisene e le Pule Faatonu i luga o tuutuuga tutusa.

(3) E mafai e le Pule Faatonu ona faafou se laisene i luga o tuutuuga fou pe teena le toe faafouina o se laisene pe afai:

(a) ua solia e le kamupani ua laiseneina le tasi pe sili atu o tuutuuga autu o laisene, po o lenei Tulafono, po o se tulafono faatonutonu, tulafono faafoe po o se poloaiga ua faia i lalo o lenei Tulafono; po o

(b) o suiga i:

(i) so o se feagaiga faava o malo lea o lo o avea ai Samoa ma vaega; po o

(ii) so o se noataga po o se fautuaga po o tulaga aloaia ua talafeagai i le Malo po o Samoa; po o

(iii) so o se tulafono talafeagai, e manaomia le toe faafou i luga o tuutuuga fou po o le teena o le toe faafou e pei ona manaomia; po o

(c) ua manaomia e le Pule Faatonu e faapea o se toe faafouga i luga o tuutuuga fou po o le teena o le toe faafou ina ia faatino i lenei Tulafono i se

faiga e ogatasi ma sini ua tusia faasolo i totonu o le fuaiupu 3 .

VAEGA IV **AVANOA LAUTELE**

20. Faiga faavae i avanoa lautele-(1) E mafai e le Pule Faatonu ona faatu, ma e mafai e le Minisita ona faamaonia, se faiga faavae e faatulaga mai ai sini maoti ma aiaiga faavae e faasino i ai ma noataga o auaunaga e faasino i aiaiga o avanoa lautele i fesootaiga i auaunaga tau fesootaiga i totonu o Samoa.

(2) E mafai e le Minisita ona faavae se faalapotopotoga faufautua, ina ia tusa ai ma le VaegaVI o le Tulafono a le Matagaluega o Fesootaiga ma Faamatalaga Tekonolosi, e fautuaina ai le Pule Faatonu ma le Minisita mo le saunia o se faiga faavae mo Avanoa Lautele.

(3) I le saunia o se faiga faavae o avanoa lautele, e tatau i le Pule Faatonu ona iloilo:

- (a) sini mo le atinae o avanoa lautele;
- (b) auaunaga faavae tau fesootaiga e ao ona aofia ai i totonu o noataga o avanoa lautele;
- (c) nofoaga e tatau ona ausia ai le maualuga ua faamaotiina o avanoa lautele; ma
- (d) tau o noataga o auaunaga i avanoa lautele.

(4) I le saunia ai o se faiga faavae o avanoa lautele, e tatau i le Pule Faatonu ona faamautu so o se noataga a tagata o lo o tuuina atu auaunaga o avanoa lautele:

- (a) ua faia i se faiga manino, ma faiga faatauva e le faaituau; ma
- (b) e lē soona mamafatū nai lo le tulaga manaomia mo le faaaogāina faalauaitele o sini e tatau ona ausia.

(5) E tatau i le Pule Faatonu ona feutgai ma vaega o lo o aafia ai pe a oo ina saunia se faiga faavae e faaaogāina faalauaitele.

(6) E lē tatau ona faaaogāaina le Vaega III o le Tulafono o Faalapotopotoga a le Malo (Faatinoga o Galuega ma le Mafai ona Tali Atu) 2001 lea e faasino i Noatiaga Tau i Galuega i Nuu ma Alalafaga i le Vaega IV o lenei Tulafono.

21. Faaputugatupe mo Avanoa Lautele-(1) I le maea ai o le faamaonia o se faiga faavae e avanoa lautele, e mafai e le Minisita, e ala i se faasilasilaga tusitusia ona faatuina se Faaputugatupe mo avanoa lautele e faaaogāina e faaitiitia ai le tau o le tuuina atu o avanoa lautele.

(2) O se Faaputugatupe mo Avanoa Lautele ua faavaeina i lalo o lenei fuaiupu e tatau ona faia e tagata e faatonutonuina ma ia tusa ai ma so o se faatonuga tau le puleaina o tuge ua tuuina atu e ala i se tusitusiga e le Ofisa Sili o Pulega a le Matagaluega o Tuge.

(3) E tatau ona faagaoioia le Faaputugatupe mo Avanoa Lautele i se teugatupe e ese mai i le Matagaluega po o teugatupe faagaoioi a le Pule Faatonu.

(4) I le noatia ma le fai fuafua i le (5); pe afai ua faavaeina se Teugatupe i lalo o le faafuaiupu (1), e tatau i le Minisita, e ala i se faasilasilaga tusitusia mai lea taimi i lea taimi, ona:

- (a) manaomia le totogi o saofaga i le Faaputugatupe a kamupani uma ua laiseneina; ma
- (b) fuafua noatiaga tau saofaga a kamupani ua laiseneina ma taualumaga mo le Faasoaina o le Faaputugatupe.

(5) O taualumaga o le faasoasoaina o le Faaputugatupe e tatau ona faatauva ma faigofie i maketi.

VAEGA V PULEGA O FUSI O ALALEO TAU LEITIO

22. Galuega tauave a le Pulega o Fusi o alaleo-(1) E tatau ona avea ma matafaioi a le Pule Faatonu le faagaoioia lelei ma le malosi o le pulega, vaevaeina ma le faasoasoaina o alaleo i le fusi o alaleo tau leitio.

(2) I le tulaga e faasino i le pulega o fusi o alaleo tau leitio, e tatau i le Pule Faatonu:

- (a) ona fautua i le Minisita i mataupu e faasino i le faaaogāina po o le pulega o fusi o alaleo;
- (b) faafoe fesili a tagata lautele e faasino i le faaaogāina po o le pulea o fusi o alaleo, pe afai ua fuafua e le Pule Faatonu e faapea o ia fesili e talafeagai pe

aoga foi i le Pule Faatonu i le pulea o fusi o alaleo;

- (c) saunia ma lomia faasalalau se fuafuaga mamao mo fusi o alaleo ma nisi lava fuafuaga mamao tau fusi o alaleo o lo o manaomia, fuafuaga o peau ea televavae, o alaleo, fuafuaga tau maketi ma fuafuaga mo le faaaogāina o alaleo i nisi peau ea eseese;
- (d) ia faamautu e faapea o le faaaogāina o fusi o alalelo o lo o ogatasi ma so o se feagaiga faava o malo talafeagai, feagaiga aloaia ma tulaga aloaia;
- (e) foia o feeseseseaiga tau le felavasai o alaleo, pe afai e le mafai ona foia e vaega na feeseseseai i se auala e faamalieina ai le Pule Faatonu;
- (f) faia o taiala faafaufautua e faasino i le faaaogāina fusi o alaleo, pe afai e fuafua e le Pule Faatonu o ia taiala e talafeagai pe aogā mo le puleaina e le Pule Faatonu o fusi o alaleo;
- (g) tuuina atu laisene o alaleo i tagata faatagaina e faaaogā alaleo ma faia faasalalauga i leitio;
- (h) faafoe mataupu e faatatau i totogifuapauina o alaleo, e aofia ai le totogifuapauina ua faatulagaina e ala i tulafono faatonutonu i lalo o le fuaiupu 10;
- (i) fuafua, faasoa ma tuuina atu fusi o alaleo po o isi lava mataupu e faasino i faasalalauga o fesootaiga tau leitio (pe auala i se satelite, i luga o le fogaelele po o isi faasalalauga); ma
- (j) faatino isi lava matafaioi e faasino i fusi o alaleo e pei ona faaeeina atu i le Pule Faatonu i se isi Tulafono po o se tulafono faatonutonu po o tulafono faafoe.

23. Tulafono Faatonutonu o Fusi o alaleo tau Leitio-(1)

E tatau i le Pule Faatonu ona faia tulafono faafoe mai lea taimi i lea taimi e tagofia lelei ai le puleaina fusi o alaleo i totonu o Samoa. E mafai i Tulafono Faafoe ona tuuina atu faatasi ai ma isi vaega:

- (a) vasega po o isi ituaiga o fusi o alaleo o leitio meafaigaluega tau leitio;

- (b) le manaomia o laisene tau fusi o alaleo tau leitio e faatagaina ai le faaaogāina o alaleo;
 - (c) manaomia le faatagana o le faaaogāina o meafaigaluega tau leitio;
 - (d) manaoga faatekinisi ma tulaga aloaia e faasino i meafaigaluega o leitio, meafaigaluega e mafua ai le felavasai o masini tau leitio ma meafaigaluega e aafia ai leitio; ma
 - (e) taualumaga, tuutuuga ma tapulaa e faasino i le faaaogāina o fusi o alaleo ma meafaigaluega tau leitio;
- (2) E tatau i Tulafono faafoe i lalo o le faafuaiupu (1) ona noatia ai tagata uma o lo o faaaogāina alaleo po o meafaigaluega tau leitio i totonu o Samoa.

24. Feeseseaiga ona o le felavasai o fesootaiga ma le Faamaopoopoina-(1) I le foia ai o feeseseaiga e mafua mai i le felavasai o fesootaiga, e mafai e le Pule Faatonu ona:

- (a) tofia se sui lautogia e foia feeseseaiga e tusa ai ma aiaiga o le Tulafono o Faiga e Teuteuina ai se Finauga i le Faaigu a ni sui Lautogia 1976;
 - (b) lautogia le aufaigaluega po o tagata faigaluega tomai faapitoa faatekanisi na tofia e le Pule Faatonu e foia le feeseseaiga, ma lipoti atu i le Pule Faatonu se faaiuga talafeagai e foia ai le feeseseaiga pe afai e lē faamanuiaina le latou taumafaiga.
 - (c) tuuina atu se faatonuga e foia ai le feeseseaiga, i le mauaina po o le leai foi o se lipoti e tusa ai ma le parakalafa(b).
- (2) E tatau i le Pule Faatonu ona feutagai ma faamaopoopo le faaaogāina o alaleo tau leitio faatasi ma isi atunu, tagata faava-o-malo o lo o faaaogāina ma faalapotopotoga faava-o-malo, e pei o le Iuni o Fesootaiga Faava-o-Malo e pei ona manaomia i le tulafono po o le feagaiga ua faamamaluina po o se isi faiga e fuafuaina e le Pule Faatonu.

VAEGA VI
FAIGA FAAVAE O TULAGA FAATAUVA

25. Galuega tauave ma tiute tauave a le Pule Faatonu e faasino i faiga faatauva-(1) E tatau i le Pule Faatonu ona faatino galuega tauave ma tiute tauave ua ttau i lalo e faasino i faiga faatauva i le va o kamupani o lo o tuuina atu auaunaga i maketi tau fesootaiga i totonu o Samoa:

- (a) ia uunaia faiga faatauva lelei ma gafataulima mo le manuia o tagata o lo o auai;
 - (b) faia se faavae saoloto ma manino o galuega e faaitiitia ai tapulaa faatonutonu e ofi atu ai i maketi tau fesootaiga;
 - (c) faia faatonuga e faamatala ai maketi ma maketi talafeagai mo le faamoemoe o lenei Tulafono;
 - (d) faia faatonuga e faatulaga ai kamupani tetele o lo o tuuina atu auaunaga i maketi talafeagai i totonu o Samoa, e faavae i luga o a latou sao i maketi ma isi tulaga e pei ona fuafuaina ina ia tusa ai ma le fuaiupu 26;
 - (e) mataitu ma taofia le soona faaaogā o le tulaga iloga o kamupani o lo o tuuina atu le tele o auaunaga, ina ia tusa ai ma le fuaiupu 27;
 - (f) mataitu ma taofia faiga o le a faatapulaa ai le faatauva, ina ia tusa ai ma le fuaiupu 28;
 - (g) toe iloilo ma faia se faaiuga i le faasee ese atu o le faafoega ua fautuaina mo kamupani o lo o tuuina atu auaunaga, ina ia tusa ai ma le fuaiupu 31;
 - (h) faia ni toe iloiloga o maketi mai lea taimi i lea taimi e fuafua ai le tulaga o i ai maketi ma faiga faatauva na maketi; ma
 - (i) foia faitioga ma feeseseaseaiga e faasino i faiga e taofiofia ai faiga faatauva i se tulaga vave ma lē faaituau.
- (2) Afai e tulai mai se feeseseaseaiga i le va o aiaiga o lenei Tulafono ma aiaiga so o se isi tulafono o lo o faatonutonuina faiga faatauva i maketi tau fesootaiga i totonu o Samoa, e aofia ai ae le faatapulaaaina i le Tulafono o Fefaatauaiga Talafeagai 1998, e tatau ona faaaogāina aiaiga o lenei Vaega.

(3) E mafai e le Pule Faatonu ona tuuina atu se poloaiga e faatagaina ai se tagata e tuuina atu se auauanga tau fesootaiga ma fausia ma faagaoioi ni nofoaga tau fesootaiga, e ese mai ai e faapea ua tuuina atu aiatatau maoti mo ia lava e ala i le laisene, maliega po o se isi faiga e ese ai, e auai ai i le tuuina atu o ia auauanga, faia po o le faafoeina, ae vagana ai e faapea:

- (a) ua tuuina atu e le Pule Faatonu i le tagata o lo o tuuina atu auauanga le faasilasilaga o aia maoti mo ia lava o le:
 - (i) faamoemoe o le Pule Faatonu ina ia tuuina atu se poloaiga i lalo o lenei faafuaiupu; ma
 - (ii) ia le itiiti ifo o le 21 aso e tuuina atu se faamatalaga a o le i faia sea poloaiga; ma
- (b) ina ua maea ona iloiloina so o se faamatalaga ua mauaina i lalo o le parakalafa(a), ua faapea ona faia e le Pule Faatonu se poloaiga e faapea o le kamupani o lo o tuuina atu auauanga o lo o i ai ana aia maoti mo ia lava, ua ia le mafai pe ua musu e tuuina atu ia auauanga, po o le fausia ma faagaoioia ia nofoaga.

26. Faatulagaga o kamupani tetele o lo o tuuina atu auauanga-(1) O kamupani taitasi uma o lo o tuuina atu auauanga e i ai a latou tupe maua e mafai ona ausia le fa sefulu pasene(40%) pe sili atu o le aofaiga tuufaatasi o tupe maua a kamupani o lo o tuuina atu auauanga i lea maketi, e tatau ona lautogia o se kamupani iloa e tuuina atu auauanga e tele i lena maketi, e vagana ai ma seiloga ua faamaoti mai e le Pule Faatonu i se isi tulga e ese mai ai i se poloaiga.

(2) E mafai e le Pule Faatonu ona lautogia se kamupani o lo o tuuina atu auauanga e itiiti ifo mai le fa sefulu pasene (40%) i le tuuaofai o tupe maua i se maketi o fesootaiga faapitoa e avea o se kmaupani iloa e tuuina atu auauanga e tele pe afai e le gaa e galue na o ia po o le galulue faatasi ma isi, o lo o maua e le kamupani o lo o tuuina atu auauanga i se tulaga malosi tau le tamaaoaiga e maua ai e ia le malosiaga e galue ai i se tulaga tutoatas Mai isi kamupani o lo o latou tauva po o tagata o lo o faaaogāina auauanga.

(3) E tatau i le Pule Faatonu ona tuuina ma tausia i totonu o lana tuatusi faakomepiuta se faasologa o kamupani iloga o lo o tuuina atu auaunaga o lo o i ai i le taimi nei o lo o faamaoti mai ai maketi ua lautogia ai lenei kamupani o lo o tuuina atu auaunaga e avea ai i latou ma kamupani e tuuina atu auaunaga e tele.

(4) E tatau ona faamaoti ma faamatala i poloaiga o lo o tuuina atu auaunaga i maketi talafeagai ia ua mafua ai ona iloga tulaga o nei kamupani ma nisi tulaga aliae e faamoemoe le Pule Faatonu e lagolagoina le tulaga iloga o sea kamupani.

27. O le Faaaogā sese o le tulaga iloga o kamupani o lo o tuuina atu auaunaga- E lē faatagaina se kamupani iloga e tuuina atu auaunaga e faia ai ni gaoioiga e faaaogā sese ai le tulaga iloga o lea kamupani, ma mo faamoemoega o lenei fuaiupu o gaoioiga ma faiga ua taua mulimuli ane, o faataitaiga ia o le faaaogā sese o le tulaga iloga o kamupani:

- (a) o le lē mafai ona tuuina atu nofoaga talafeagai i se tagata tauva i totonu o le taimi talafeagai i le maea ai o se talosaga ma luga o tuutuuga talafeagai, po o le faaituau i le tuuina atu o le soofaatasi po o isi auaunaga o fesootaiga po o nofoaga i isi kamupani e tuuina atu auaunaga; vagana ai tulaga aliae e faavae i luga o le eseесега o tulaga o fautuaga saunia, e aofia ai tau eseese po o le lē lava o nofoaga po o punaoa o i ai;
- (b) o le tuufaatasi o auaunaga tau fesootaiga, lea e manaomia ai e le kamupani e tuuina atu auaunaga, e avea o se tuutuuga o le tuuina atu o se auaunaga o se tagata tauva, e faapea ia maua se isi auaunaga e lē o manaomia e le kamupani tauva;
- (c) o le ofoina atu i le kamupani tauva ni tuutuuga e sili atu ona lelei po o tuutuuga e lē o faamaonia e ala i le eseесега o tau pe afai ua maua e le kamupani tauva se isi auaunaga na te lē o manaomia;
- (d) o le uluai umia o avanoa po o le puipuiga o nofoaga po o punaoa utiuti, e aofia ai ae lē faatapulaaina i

avanoa patino ae o lo o manaomia e se isi kamupani mo le faagaoioia o ana pisinisi faatasi ma le aafiaga o le taofia o le faaaogāina o le nofoaga po o punaoa mo lea kaumpani;

- (e) o le tuuina atu o auaunaga o fesootaiga faatauva i tau e i lalo ifo o tau aloaia po o nisi lava tau e ono mafai ona faatuina e le Pule Faatonu;
- (f) o le faaaogāina o tupe maua po o le faavasegaina o tau mai se auaunaga tau fesootaiga e tuuitiitia ai le tau o se isi auaunaga ma le faamoemoe e faaitiitia faiga faatauva, vagana ai o sea faiga ua faamaonia i se poloaiga a le Pule Faatonu po o e ala i le faamaoniga o faasologa o tau mo auaunaga tau fesootaiga;
- (g) o le lē tausisia o tuutuuga o sootaga o fetaulaiga o masini tau fesootaiga e se kamupani iloga e pei ona faamaoti e le Vaega VII o lenei Tulafono;
- (h) o le faatinoina o so o se gaoioiga ua taua i lalo, pe afai o ia gaoioiga e i ai lona aafiaga e faalavelave ai pe taofia le ofi atu o se kamupani tauva, po o le faalauteleina se maketi:
 - (i) faaitiitia ma le iloa o le tapulaa o tupe mama o lo o agavaa i ai se kamupani tauva lea e manaomia auaunaga siiatoa mai kamupani iloga e ala i le siitia o tau mo auaunaga tau fesootaiga, po o le faaitiitia o tau o auaunaga tau fesootaiga taitasi i maketi o lo o latou tauva ai, po o aga uma e lua;
 - (ii) manaomia po o le faatauanau se kamupani o lo o tuuina atu auaunaga e aloese mai le faatauina atu i se kamupani tauva;
 - (iii) faaaogāina tulaga maoti faaletulafono mo vaega tau fesootaiga po o faiga e taofia ai ma le iloa le faagaoioiga tuufaatas ma se vaega tau fesootaiga po o faiga o lo o faaaogāina e se kamupani tauva;
 - (iv) le mafai ona faaavanoa atu i isi kamupani o lo o tuuina atu auaunaga i taimi e manaomia ai tulaga maoti faaletulafono,

faamatalaga agai i nofoaga o lo o manaomia po o isi faamatalaga e aupito sili ona talafeagai mo pisinisi ia o lo o manaomia e isi lava kamupani o lo o tuuina atu auaunaga e tuuina atu ai auaunaga tau fesootaiga ma e lē o mafai ona maua mai i isi alaoa; ma

(v) faaaogāina o faamatalaga mai kamupani tauva mo faamoemoega e faasino i sootaga o fetaulaiga o masini tau fesootaiga ma le tuuina atu o auaunaga tau fesootaiga e kamupani iloga e tauva ai ma isi kamupani; ma

- (i) so o se isi lava gaoioiga po o se faiga o lo o auai ai kamupani iloga o lo o tuuina atu auaunaga e tele ua fuafuaina e le Pule Faatonu e faapea e tusa ai ma le fuaiupu 29 e mafai ona faaaogāina, pe e ono mafai ona faaaogāina, e faasaina ai pe o taufaasese ai faiga tauva i se maketi tau fesootaiga.

28. O isi Faiga e Taofiofia ai Faiga Tauva - E lē tatau i se tagata ona auai atu i se faiga e faasaina ai pe faaseseina ai faiga faatauva i maketi tau fesootaiga, e aofia ai:

- (a) fetuunaiga i le va o kamupani se toalua pe sili atu o lo o faatulagaina i se faiga tuusao pe leai foi tau o oloa po o isi aiaiga ma tuutuga o auauanaga tau fesootaiga i totonu o maketi tau fesootaiga;
- (b) fetuunaiga i le va o kamupani se toalua pe sili atu o lo o fuafuaina i se faiga tuusao pe leai foi po o ai le kamupani o le a ia mauaina se konekarate po se avanoa faapisinisi i se maketi tau fesootaiga; ma
- (c) fetuunaiga i le va o ni kamupani se toalua pe sili atu i le faasoaina, vavaeina ia i latou lava po o isi kamupani o lo o tuuina atu auaunaga.

29. Faia o Faaiuga i le Faaaogā Sese o le tulaga iloga o kamupani ma Faiga e Taofiofia ai Faiga Faatauva - E mafai e le Pule Faatonu, e ala i le talosaga a so o se tagata, po o le fuafuaga lava a le Pule Faatonu ona faia le faaiuga:

- (a) pe o gaoioiga po o galuega a le kamupani iloga po o faaaogā sese lona tulaga iloga e pei o le faauigaina o le fuaiupu 27;
- (b) pe o gaoioiga po o galuega a so o se kamupani o lo o tuuina atu auaunaga e oo atu ai i se faiga e taofiofia ai faiga faatauva pe leai foi i totonu lava o le faauigaga o le fuaiupu 28; ma
- (c) e faapea o se gaoioiga po o galuega a se tagata o lo o tuuina atu auaunaga i lalo o le fuaiupu 27 po o le 28 ua faatagaina ma e lē tatau ona faapea e faalavelaveina ai lenei Tulafono, i luga o mafuaaga e faapea o ia gaoioiga po o galuega o lo o aiā i ai tagata lautele ma o i si uiga o lo o ogatasi ma sini o lo o faatulaga mai i totonu o le fuaiupu 3.

30. Auala e Foia ai le Faaaogā Sese o le tulaga iloga o kamupani ma Faiga e taofiofia ai Faiga Faatauva-(1) Afaia ua manatu le Pule Faatonu e faapea o gaoioiga ma galuega a se kamupani o lo o tuuina atu auaunaga o lo o faaaogā sese ai le tulaga iloga po o se faiga e taofiofia ai faiga faatauva i totonu o le faauigaga o lenei Tulafono po o se tulafono faatonutonu po o se tulafono faafoe, e mafai e le Pule Faatonu ona tuuina atu se poloaiga e :

- (a) manaomia ai le tagata e toatasi pe sili atu foi o i latou o lo o tuuina mai i totonu o le poloaiga ia faia le gaoioiga po o le sili atu ua taua e faapea:
 - (i) faamuta le gaoioiga po o galuega ua faamaoti mai i le poloaiga i lena lava taimi, po o i sea taimi e pei ona faamaoti mai i le poloaiga, ma i le noatia ma le fai fuafua i ia tuutuuga ua faamaoti mai i le poloaiga;
 - (ii) faia suiga maoti i gaoioiga po o galuega na faamaoti mai i le poloaiga, e avea ma faiga e aveesea ai pe faaitiitia ai le faaaogā sese po o aafiaga o le taofiofia o faiga faatauva; ma/po o

- (b) faaee atu se totogi faaopoopo e le silia le \$100,000 i se kamupani o lo o tuuina atu auaunaga o ana gaoioiga o lo o aofia ai:
 - (i) le faaaogā sese o le tulaga iloga o galuega; po o
 - (ii) se faiga e taofiofia ai faiga faatauva; ma/po o
 - (c) manaomia le kamupani o lo o tuuina atu auaunaga o lo o aafia ai i le gaoioiga tau faasese po o galuega po o faiga e taofiofia ai faiga faatauva ma so o se tagata ua aafia i lea gaoioiga, galuega po o faiga e faafetaui ai se taumafaiga e fuafua ai auala e foia ai pe taofia ai le faaauau pea o sea gaoioiga, galuega po o le faiga ma foia so o se feeseseaiga o lo o totoe; ma/po o
 - (d) manaomia le kamupani o lo o tuuina atu auaunaga lea na gafa ma le gaoioiga e faaaogā sese ai po o gaoioiga e taofiofia ai faiga faatauva po o galuega ua faamaoti mai i le poloaiga ina ia lomia faasalalau se faasilasilaga ma se faatoesega mo sea gaoioiga, galuega po o se faiga i le gagana Samoa ma le gagna peretania i totonu o le Savali ma se isi nusipepa o lo o faasalalauina i totonu o Samoa, i se faiga ma sea taimi e pei ona faamaoti mai e le Pule Faatonu i totonu o le poloaiga; ma/po o
 - (e) manaomia le tuuina atu e le kamupni o lo o tuuina atu auaunaga le lipoti faavaitimi i le Pule Faatonu e lagolago ai le fuafuaina pe faaauau pea le gaoioiga po o le galuega pe leai foi ma fuafua o latou aafiaga i maketi tau fesootaiga, kamupani tauva ma tagata o lo o faaaogāina auaunaga.
- (2) O se totogi faaopoopo faaletupe ua faaeeina atu i lalo o faafuaiupu (1)(b) e tatau ona totogi atu i le Teugatupe a le Malo.
- (3) Mo le faamoe ia aveesea ai le lotomasalosalo, e mafai ona faalēaogāina e le Pule Faatonu se laisene pe afai ua lē mafai e le kamupani ua laiseneina ona totogi atu totogi faaopoopo faaletupe na faaee atu i lalo o le faafuaiupu (1)(b).

31. Faasee atu o le Vaaia o kamupani o lo o Tuuina atu Auauanaga-(1) I le noatia ma le fai fuafua i lenei fuaiupu, e lē tatau ona manaomia se faamaoniga mo le faasee ese atu o le vaaia o se kamupani o lo o tuuina atu auaunaga.

(2) E lē tatau ona faamamaluina se faasee ese atu o le vaaia o se kamupani o lo o tuuina atu auaunaga e aunoa ma le faamaoniga na muamua tuuina mai a le Pule Faatonu pe afai;

(a) o se kamupani iloga po o se sui auai o le kamupani iloga o:

(i) na maua atoatoa e le tagata le vaaiga o le kamupani o lo o tuuina atu auaunaga; po o

(ii) le kamupani lea ua faasee atu i ai le le vaaiga; po o

(b) i le maea ai o le faasee ese atu, o se tagata na o ia pe ma se vaega, o le a ia vaaia kamupani o lo o tuuina atu auaunaga lea o le aofaiga atoa o a latou tupe maua i se maketi tumaoti tau fesootaiga e fa sefulu pasene (40%) pe sili atu foi i le tuufatasiga atoa o tupe maua a kamupani uma o lo o tuuina atu auaunaga i totonu o lea lava maketi.

(3) E lē tatau ona faamaeaina se faasee ese atu o le vaaia lea e manaomia ai le faatagaga i lalo o le faafuaiupu (2) pe i ai sona malosi faaletulafono pe faamamaluina ai vagana ai ua mauaina e le tagata talosaga mo le faamaoniga mai le Pule Faatonu i le faatagaga tusitusia.

(4) O talosaga mo le faasee ese o le vaaiga ia e manaomia le faamaoniga i lalo o le faafuaiupu (2) e tatau ona aofia ai ia faamatalaga i luga o feuiaiga faapisinisi fuafuaina mo le faasee ese e pei ona manaomia e le Pule Faatonu. E tatau i ia faamatalaga, a itiiti mai, e aofia ai:

(a) o le ilogofie o tagata uma o lo o aafia ai i le feuiaiga o le faasee ese, e aofia ai tagata e faatauina mai ma faatauina atu, tagata o lo o umia a latou sea ma kamupani o lo o latou galulue faatasi, ma nisi lava tagata e sili atu i le lima pasene (5%) le latou umia o tupe tului a ia tagata uma;

- (b) o se faamatalaga o le natura o le feuiaiga faapisinisi ma se otootoga o ana tuutuuga faapisinisi;
- (c) faamatalaga faaletupe o tagata o lo o aafia i le feuiaiga faapisinisi, e aofia ai a latou tupe maua faaletausaga mai maketi tau fesootaiga, e iloagofie i maketi tumaoti, tau aoga o aseta ua tuuina atu atoa i pisinisi tau fesootaiga ma ata o so o se lipoti lata mai faaletausaga po o lipoti faaletupe fai kuata tausaga; ma
- (d) se faamatalaga o maketi tau fesootaiga talafeagai lea e faafoe e tagata o lo o aafia ai i feuiaiga faapisinisi.

(5) E mafai ona talosagaina e le Pule Faatonu ni faamatalaga faaopoopo e faasino i se talosaga mo le faaliliuina atu o le vaaia lea e manaomia ai le faamaoniga i lalo o le faafuaiupu (2) i so o se taimi.

(6) I le noatia ma le fai fuafua i le faafuaiupu (7), i totonu o le ivasefulu (90) aso i le mauaina o se talosaga aloaia ua maea mo le faaliliuina atu o le vaaia lea e manaomia ai le faamaoniga i lalo o le faafuaiupu (2), e tatau i le Pule Faatonu ona;

- (a) faamaonia le faaliliuina atu o le vaaia e aunoa ma ni tuutuuga; po o le
- (b) faamaonia o le faaliliuina atu o le vaaia faatasi ma ia tuutuuga e faasino i le uunaia o le atiaeina o faiga faatauvu ma saoloto o maketi tau fesootaiga i totonu o Samoa ma faateleina ai le manuia o le feuiaiga faapisinisi mo tagata o lo o faaaogāina fesootaiga; po o
- (c) faafitia le faaliliuina atu o le vaaia; po o
- (d) tuuina atu o se faaaliga e fuafua ai se suesuega o le fuafuaga e faaliliuina atu le vaaia, ma i le tulimataia o se suesuega e tatau i le Pule Faatonu ona faia se gaoioiga e pei ona faatulaga mai i parakalafa (a), (b) ma le (c).

(7) E faatoa tatau i le Pule Faatonu ona faafitia se faaliliuina atu o le vaaia pe faapipii atu tuutuuga i se faaliliuina atu o le vaaia i lalo o lenei fuaiupu pe afai ua fuafua e le Pule Faatonu i le faia pe afai, e faapea o le faaliliuina atu o le a

matua afaina ai se taunuuga lelei mo tagata o lo o faaaogāina fesootaiga mamao.

VAEGA VII
FETAULAIGA O LAINA TAU FESOOFTAIGA

32. Galuega tauave ma Tiute tauave o le Pule Faatonu e faatatau i Fetaulaiga o Laina Tau Fesootaiga - E tatau i le Pule Faatonu ona faatinoina galuega tauave ma tiute tauave ua taua i lalo e faatatau i fetaulaiga o laina tau fesootaiga:

- (a) uunaia fetaulaiga o fesootaiga, tau talafeagai ma avanoa i kamupani o lo o tuuina atu auaunaga i nofoaga o fesootaiga o isi kamupani e tuuina atu auaunaga, ina ia faatagaina ai le faagaoioiga faatasi o auaunaga tau fesootaiga i totonu o Samoa ma uunaia le atiaeina o maketi faatauva o auaunaga tau fesootaiga;
- (b) faatuina se taiala faavae faaletulafono e saoloto, le faaituau ma aupito sili ona talafeagai mo sootaga o fetaulaiga o masini tau fesootaiga ma avanoa ai i se vaiga e faaitiitia ai tapulaa e ulufale atu ai i maketi tau fesootaiga;
- (c) uunaia fetuunaiga o sootaga o fetaulaiga o masini tau fesootaiga, e aofia ai le faafaigofieina o feutagaiga i le va o ni vaega e ausia ai maliega i sootaga o fetaulaiga o masini tau fesootaiga;
- (d) ia faamautu e faapea o maliega o sootaga o fetaulaiga o masini tau fesootaiga e ausia isi faiga e ese ai sini o lenei Tulafono;
- (e) fuafuaina po o ai kamupani iloga i le maketi mo sootaga tau fetaulaiga o masini tau fesootaiga;
- (f) afai e talafeagai i le manatu o le Pule Faatonu, ia faatonutonu faaletulafono tau mo sootaga o fetaulaiga o masini tau fesootaiga ma auaunaga e avanoa i ai kamupani iloga i maketi tau fesootaiga mo sootaga o fetaulaiga o masini tau fesootaiga ma auaunaga e avanoa i ai kamupani iloga i maketi tau fesootaiga mo sootaga o fetaulaiga o masini tau fesootaiga;

- (g) ia faamautu e faapea o kamupani iloga o sootaga tau fetaulaiga ua lomia faasalalau se faamatalaga o tuutuuga e faasino i sootaga o fetaulaiga o masini tau fesootaiga e se kamupani iloga ina ia tusa ai ma le fuaiupu 37 o lenei Tulafono ma so o se tulafono faatonutonu, tulafono faafoe ma poloaiga e talafeagai i sootaga o fetaulaiga o masini tau fesootaiga;
- (h) foia feeseseaiga e faasino i sootaga o fetaulaiga o masini tau fesootaiga i se taimi vave ma le faaituau; ma
- (i) faia poloaiga e faamaoti ai tuutuuga o sootaga o fetaulaiga o masini tau fesootaiga ia e tatau ona tuuina atu e se tasi o kamupani pe sili atu o lo o tuuina atu auaunaga, e aofia ai fetuunaiga tuusao, e le tuusao ma e tatau ai.

33. Sootaga o Fetaulaiga o Masini tau Fesootaiga a Kamupani e Tuuina atu Auaunaga-(1) I le mauaina o se talosaga tusitusia mai se isi kamupani o lo o tuuina auaunaga, e tatau i se kamupani o lo o tuuina atu auaunaga ona auai atu i feutanaiga e faia i le agaga lelei ina ia auai atu ai i se maliega o fetaulaiga o laina tau fesootaiga e;

- (a) fesootai ma tumau ai pea le fesootai o sootaga tau fesootaiga o kamupani uma e lua ia o lo o tuuina atu auaunaga; ma
- (b) tuuina atu avanoa i ia nofoaga tau fesootaiga, e aofia ai ae le faatapulaaina i ofisa tutotonu ma isi nofoaga o lo o i ai meafaigaluega e ki ai, nofoaga o pou faailoilo, pou o fesootaiga, pou, laina e avanoa i ai tagata o lo o faaaogāina ma nofoaga i lalo o le eleele, e pei ona talosagaina ina ia tuuina atu ai auaunaga tau fesootaiga i tagata o lo o faaaogāina e tagata o lo o tuuina atu auaunaga. So o se suiga i tulaga o nofoaga e tatau ona noatia ma fai fuafua i le fuaiupu e 68.

(2) O gaoioiga po o faiga ua taua i lalo e tatau ona avea e faapea e soloia ai tiute tauave o lo o i le faafuaiupu (1) e feutagai ai ma le agaga lelei;

- (a) faalavelaveina po o le faatuatuai o feutagaiga, po o le le mafai ona faia o se taumafaiga talafeagai e foia ai feeseseaiga o lo o i ai;
 - (b) musu e tuuina atu faamatalaga e faasino i auaunaga tau fesootaiga o lo o umia e le kamupani o lo o tuuina atu auaunaga po o sootaga tau fesootaiga po o isi nofoaga o lo o manaomia mo fetuunaiga o sootaga tau fesootaiga;
 - (c) taufaasese po o le faamalosia o se vaega ia ausia ai se maliega sa le tatau i se isi faiga ona faataunu;
 - (d) faalavelave i so o se auala i le mafai ona fesootai atu o se kamupani o lo o tuuina atu auaunaga i le Pule Faatonu, e aofia ai le tauanau o se kamupani e saini se maliega lea e le mafai ai ona faailoa atu e le kamupani o lo o tuuina atu auaunaga faamatalaga lea na talosagaina e le Pule Faatonu; po o
 - (e) musu e faataga le toe teuteuina o le maliega o le fetaulaiga o laina tau fesootaiga ina ia amanaia ai suiga i tulaga aliae, e aofia ai suiga i lenei Tulafono; se tulafono faatonutonu po o se tulafono faafaoe.
- (3) Afai e le i faia e le Pule Faatonu se isi poloaiga, e le tatau ona manaomia le auai ai o se kamupani i se maliega o sootaga tau fesootaiga i luga o tuutuuga e faapea, i le manatu talafeagai o lea kamupani e tuuina atu auaunaga;
- (a) e faatupuina pe ono faatupuina ai ni lamatiaga ogaoga, faaleagaina po o ni manua i so o se tagata po o i so o se meatotino;
 - (b) e faatupu le faaleagaina ogagoa po o le faalavelave i le fagaoioiga o galuega tau fesootaiga e le kamupani o lo o tuuina atu auaunaga, nofoaga tau fesootaiga po o le tuuina atu o galuega tau fesootaiga e le kamupani o lo o tuuina atu auaunaga; po o
 - (c) e le o talafeagai, pe a fua i faafitauli tau tekinisia ma faaletulafono tau le tamaoaiga.
- (4) E mafai i so o se taimi e kamupani o lo o tuuina atu auaunaga ma isi vaega e fesootai i ai ona talosagaina le Pule

Faatonu ina ia tuuina atu se poloaiga e faamalamalama ai pe faauigaina ai aia tau fesootaiga i le va po o noatiaga ua faatulagaina mai i lenei Tulafono, se tulafono faatonutonu, tulafono faafoe po o se poloaiga.

34. Sootaga o Fetaulaiga o Masini tau Fesootaiga a Kamupani Iloga e Tuuina atu Auaunaga-(1) O fuaiupu 35, 36, 37 ma le 38 e faatoa faaaogā i kamupani o lo o tuuina atu auaunaga ua uma ona faatulaga e le Pule Faatonu e avea o kamupani iloga mo faamoemoega o sootaga tau fesootaiga i se maketi e tasi po o le sili atu tau fesootaiga;

(2) E mafai e le Pule faatonu ona tuuina atu se poloaiga e faatulaga ai se kamupani e avea ma kamupani iloga e tuuina atu auaunaga mo faamoemoega o sootaga tau fesootaiga i se maketi e tasi pe sili atu tau fesootaiga pe afai e manatu le Pule Faatonu e faapea:

- (a) o le kamupani iloga o lo o tuuina atu auaunaga i totolu o le uiga o lenei Tulafono; po o
- (b) o le kamupani o lo o tuuina atu le auaunaga, pe na o ia pe galulue soosoo tauau ma isi, o lo o fafia pea i le tulaga tutusa o i ai ma se kamupani iloga.

35 Talosaga mo Sootaga o Fetaulaiga o Masini tau Fesootaiga-(1) O fetuunaiga o sootaga tau fesootaiga ia e ofo atu e kamupani iloga ua faatulaga e tusa ai o le fuaiupu 34, e faaopoopo atu i le faafetaiaia o manaoga o le fuaiupu 33, e tatau:

- (a) ona ogatasi ma lenei tulafono ma so o se tulafono faafoe ma poloaiga ua faia e le Pule Faatonu a o lumanai ai le aso o le tauofoga, e aofia ai so o se taiala ua faamatalaina i le tulafono e faasino i tau faaee atu o sootaga tau fesootaiga ma auaunaga i le tulaga aupito maualuga;
- (b) ona le sili atu lona amanaia i lo so o se faamatalaga o tuutuuga o sootaga na faamaonia e le Pule Faatonu mo le kamupani o lo o tuuina atu le auaunaga;

- (c) ona faamalieina talosaga uma e talafeagai mo sootaga tau fesootaiga faatasi ma le kamupani iloga i so o se itu lelei; ma
- (d) isi lava itu uma , ia tuufaatasia ni uiga talafeagai ma ni tuutuuga, e aofia ai tapulaa tau le poto faapitoa ma itu ua aiaia.

(2) O kamupani iloga taitasi uma ua lautogia e tusa ai ma le fuaiupu 34 e tatau ona faia ia mautinoa e faapea o le kamupani iloga o lo o tuuina atu le auaunaga e tatau ona:

- (a) faaaogāina aiaiga faapena e kamupani uma o loo tuuina atu le auaunaga i lalo o ia foi tulaga aliae mai;
- (b) ua na tuuina atu sootaga tau fesootaiga i kamupani mo sootaga tau fesootaiga i lalo o ia lava aiaiga ma auaunaga tutusa i le tulaga aupito manaomia a o ia tuuina atu le auaunaga mo kamupani iloga ma a latou auaunaga tau fesootaiga, po o i latou e faifaimea faatasi ma le kamupani iloga o lo o tuuina atu auaunaga;
- (c) ua na faaavanoa atu i luga o se talosaga faamatalaga uma e tatau ai po o e ono manaomia faatasi ai ma itu ua aiaia faapitoa i kamupani o lo o tuuina atu le auaunaga ia o lo o talosaga mo sootaga tau fesootaiga; ma
- (d) ua na faaaogāina na o faamatalaga na maua mai i se kamupani o lo o tuuina atu auaunaga o lo o sailia sootaga tau fesootaiga ma le faamoemoe na tuuina mai ai ia faamatalaga ma e le faailoa atu ia faamatalaga pe faaaogā i se tasi faiga e ese ai ina ia maua ai se itu lelei faatauva.

36. Tau Faaee atu o sootaga tau Fesootaiga-(1) O tau faaee atu a kamupani lautogia ua faatulagaina e tusa ai o le fuaiupu 34 ona tausisia so o se tulafono faafoe po o poloaiga e faaaogā i sootaga tau fesootaiga e aofia ai so o se tau faatulagaina, tau fuafuaina ma taiala o tau o le tuueseeseina ua faatulaga e tusa ai ma le fuaiupu 34 e tatau ona fuafua i tupe faaalu. E mafai e le Pule Faatonu ona faamaonia se fuafuaga e faaofi ai lenei manaoga i le faagasologa o taimi i le amanaia ai o

aafiaga tau tupe a kamupani iloga e tuuina atu auaunga tau fesootaiga ua aafia.

(2) I le faatulagaina o totogi tau fesootaiga i totonu, o le a tatau i tagata autu lautogia e tuuina atu auaunaga e tusa ai ma le fuaiupu 34 ona tausisia so o se tulafono laititi po o poloaiga e faaaogā i fesootaiga i totonu, e aofia ai so o se tau faatulagaina, tau fuafuaina ma taiala o tau o le tuueseeseina ua faatulaga i se poloaiga a le Tagata e faatonuina galuega.

(3) E mafai e le Pule Faatonu ona manaomia tau o sootaga tau fesootaiga a so o se kamupani iloga e tuuina atu auaunaga e tusa ia ma le fuaiupu 34 ina ia muai faamaonia muamua e le Pule Faatonu e aofia ai le malosiaga e faatonu ai sea kamupani o lo o tuuina atu le auaunaga ina ia faatinoina totogi na fuafuaina e le Pule Faatonu.

37. Aiaiga aloaia o sootaga o masini tau fesootaiga-(1) E tatau i kamupani iloga ona tuuina atu auaunaga e tusa ai ma le fuaiupu 34 ona:

- (a) saunia se tauofoga o faamatalaga o tuutuuga o sootaga i masini tau fesootaiga e faamaonia e le Pule Faatonu i totonu o le vaitaimi o lo o aiaia manino i le poloaiga a le Pule Faatonu;
- (b) faamaopoopo i vaitaimi le faamatalaga o tuutuuga o sootaga o fesootaiga e pei ona aiaia e le poloaiga a le Pule Faatonu;
- (c) lomia faasalalau le faamatalaga o tuutuuga o sootaga i masini tau fesootaiga e ala i le:
 - (i) tuuina atu o se ata i le Pule Faatonu, o ia lea o le a tatau ona ia lomia faasalalau le faamatalaga o sootaga tau fesootaiga o le tuatusi faakomepiuta aloaia a le Pule Faatonu;
 - (ii) fai o se ata e mafai ona tuuina atu i totonu o le ofisa autu o le kamupani iloga e tuuina atu auaunaga; ma
 - (iii) auina atu o se ata i soo se kamupani e tuuina atu auaunaga pe a manaomia.

(2) E tatau i soo se faamatalaga o sootaga tau fesootaiga, ona:

- (a) tausisia so o se tulafono faafoe po o poloaiga e faasino i sootaga tau fesootaiga e aofia ai so o se taiala e faaaogā mo faamatalaga o sootaga tau fesootaiga i le poloaiga a le Pule Faatonu;
- (b) aofia ai se lisi atoa o galuega e tuuina atu i kamupani e tuuina atu auaunaga, ia faaalia manino ai aiaiga ma tuutuuga e aofia ai totogi mo galuega taitasi.

38. Lomiga o Feagaiga tau Fesootaiga i totonu-(1) E tusa ai ma le fuaiupu 34, o kamupani iloga uma ua filifilia i lalo o lea fuaiupu, e tatau ona tuuina mai se ata o le feagaiga i le Pule Faatonu i totonu o le sefulu (10) aso ina ua maea le faia o le faamatalaga o tuutuuga o sootaga i masini tau fesootaiga.

(2) I le noatia ma le fai fuafua i le faafuaiupu (3),(4) ma le (5), e tatau i le Pule Faatonu ona tuuina se ata o feagaiga uma o sootaga o fesootaiga i luga o le tuatusi faakomepiuta aloaia a le Pule Faatonu, ia ua tuuina atu i le Pule Faatonu e tusa ai ma le faafuaiupu (1).

(3) I le noatia ma le fai fuafua i le faafuaiupu (4) ma le (5), e mafai e le kamupani o lo o tuuina atu auaunaga ona tuuina atu faamatalaga o lo o aofia i totonu o se maliega tau sootaga o o fesootaiga lea na ia tuuina atu i le Pule Faatonu ina ia tusa ai ma le faafuaiupu (1) e avea ma faamatalaga puipuia, ma talosagaina e faapea ia aua nei aofia ai ia faamatalaga agatapuia i le ata o le feagaiga o sootaga o fetaulaiga o masini o fesootaiga ua tuuina i totonu o le tuatusi faakomepiuta aloaia a le Pule Faatonu.

(4) Mo faamoemoega o lenei fuaiupu:

- (a) e le tatau ona iloiolina e agatapuia auiliiliga o tau faaee atu o sootaga o fetaulaiga o masini o fesootaiga vagana ai o lo o i totonu o le lio lea na faamaonia talu ai e le Pule Faatonu; ma
- (b) e le tatau ona faapea e agatapuia aiaiga ma tuutuuga e manaomia o sootaga o fetaulaiga o masini o fesootaiga, e ese ai nai lo tau faaee atu o sootaga o fetaulaiga o masini o fesootaiga.

(5) E tatau i le Pule Faatonu ona fuafua po o a isi faamatalaga e tatau ona faapea e agatapua i lalo o lenei fuaiupu ma foia ai i se faiga mausali ma noatia ai feeseseseaiga uma e faasino i le faailoa mai o faamatalaga ua faatulagaina e agatapua i feagaiga tau sootaga o fetaulaiga o masini o fesootaiga ua tuuina atu i le Pule Faatonu i lalo o lenei fuaiupu.

39. O le lē tausisia o tau sootaga o fetaulaiga o masini o fesootaiga—Afafua ina e le Pule Faatonu e faapea ua le tausisia e se feagaiga o sootaga o fetaulaiga o masini o fesootaiga lenei Tulafono, po o manaoga o so o se tulafono faatonutonu, tulafono faafaoe, poloaiga po o se laisene, e mafai e le Pule Faatonu ona tuuina atu se poloaiga e manaomia ai le veaga e tasi pe sili atu o le feagaiga o sootaga o fetaulaiga o masini o fesootaiga e teuteu ai le feagaiga ina ia tusa ai ma so o se faatonuga po o isi manaoga ua faamaoti mai i totonu o le poloaiga.

VAEGA VIII FAASOLOGA O TAU

40. Faatoai o Faasologa o Tau ma Faamaoniga-(1) E tatau i kamupani iloga o lo o tuuina atu auaunaga tau fesootaiga ona faatoai ma maua se faamaoniga mai le Pule Faatonu mo faasologa uma o tau, fua faatatau po o tau faaee atu mo auaunaga tau fesootaiga i maketi ua atofaina e le Pule Faatonu e avea ai latou ma kamupani iloga.

(2) E mafai e le Pule Faatonu ona tuuina atu se poloaiga e aveesea ai so o se manaoga mo le tulaga tele o galuega e tuuina atu e faatoai ai ma maua mai le faamaoniga o faasologa o tau i lalo o lenei Vaega pe afai ua fuafuaina e le Pule Faatonu e faapea:

- (a) ua lava vaega o maketi faatauva e puipuia aia a tagata o lo o faaaogāina auaunaga;
- (b) e le o matuia se faaleagaina o maketi faatauva mai i le aveesea o manaoga e faatoai ma maua mai ai se faamaoniga o le faasologa o tau;
- (c) i le tulaga o le Kamupani a le Telecom Samoa Cellular Ltd, e lē manaomia se faasologa o tau

ina ia faatoai atu mo auauanaga na laiseneina ai lea kamupani e tuuina atu i lalo o se laisene ua tuuina atu a o le i faamamaluina lenei Tulafono, pe afai o lo o aiaia mai i le laisene e faapea e lē noatia i faasologa o tau i faamaoniga faaletulafono.

(3) O faasologa o tau mo auauanaga tau fesootaiga mamao ua tuuina mai e kamupani iloga e tatau ona faavae i luga o le tau o le tuuina atu o galuega aupito sili ona lelei ma e lē tatau ona aofia ai tau faaee atu ua sili atu na mafua ai ona faia ona o le tulaga iloga o le kamupani na tuuina atu.

(4) E mafai e le Pule Faatonu ona tuuina atu se poloaiga e manaomia ai se suiga i faasologa o tau mo auauanaga tau fesootaiga mamao ua tuuina atu e se kamupani e tulaga tele galuega pe afai e lē usitaia ai le faafuaiupu (3). O sea poloaiga o le ā tatau ona filifilia le aofia ai o le faasologa fou o tau ma tuuina atu mafuaaga mo le suiga ua manaomia.

(5) E noatia ma faasologa o tau i le faatoai faatasi ma le faamaoniga a le Pule Faatonu i lalo o lenei fuaiupu ma e faatoa tatau ona faamamaluina pe a maea ona faamaonia mai e ala i se poloaiga a le Pule Faatonu. So o se feagaiga po o se fetuunaiga i le va o kamupani e tuuina atu auauanaga ma so o se tagata e faaaogāina auauanaga e talosagaina ai sea faasologa o tau, e ese ai nai lo le na faamaonia e le Pule Faatonu, ua faasaina ma, e ui lava i so o se isi tulafono, e tatau ona faaaogāina mo faamoemoega uma e avea e faapea ua faalēaogāina.

(6) Vagana ai ua faia e le Pule Faatonu se poloaiga e ese ai, e le tatau ona manaomia le kamupani iloga e tuuina atu auauanaga e faatoai po o le maua mai o le faamaoniga o faasologa o tau mo auauanaga ia e tuuina mai i maketi pe afai e le i tofia le kamupani e tuuina atu auauanaga e avea ma kamupani iloga e tuuina atu auauanaga.

(7) E le tatau ona faasalaina le kamupani e tuuina atu auauanaga mo po o le taliaina o faasologa o tau, fua faatatau, tau faaee atu, o isi iloiloga po o le faaee atu o aiaiga po o tuutuuga e ese mai ai i aiaiga o se faasologa talafeagai o tau ma faamaonia e le Pule Faatonu.

41. Lomia Faasalalau o Faasologa o Tau-(1) Vagana ai e ese ai le faatonuga a le Pule Faatonu, afai ua faatoai e le kamupani iloga e tuuina atu auaunaga se faasologa o tau po o faamatalaga o faasologa o tau i le Pule Faatonu, e tatau i le kamupani e tuuina atu auaunaga ona:

- (a) mai le aso lea na faatoai atu ai le faasologa o tau po o faamatalaga o faasologa o tau seja vagana ai ua faamaonia le faasologa o tau:
 - (i) lomia faasalalau se ata faaeletorini i totonu o le tuatusi faakomepiuta a le kamupani e tuuina atu auaunaga; ma
 - (ii) tausia se ata pepa ua avanoa i tagata lautele i ofisa autu o pisinisi a kamupani e tuuina atu auaunaga; ma
- (b) i totonu o le sefulu aso mai le aso lea na faatoai ai le faasologa o tau po o faamatalaga o faasologa o tau, ua tuuina atu se faasilasilaga i le gagana Samoa ma le faaperetania ma se tasi nusipepa o lo o i totonu o Samoa o lo o auiliili ai le faasologa o tau po o faamatalaga o faasologa o tau ma fautuaina e faapea o sea faasologa o tau po o le faamatalaga e noatia ma fai fuafua i le faamaoniga a le Pule Faatonu.

(2) Vagana ai e ese ai le faatonuga a le Pule Faatonu, e tatau ona tausia ma faamaea e le Kamupani iloga e tuuina atu auaunaga ma toe teuteu le faamatalaga o faasologa o tau ua faamaonia e le Pule Faatonu:

- (a) i totonu o se ata pepa faaeletoroni i le tuatusi faakomepiuta a le kamupani iloga o lo o tuuina atu auaunaga; ma
- (b) i totonu o se ata pepa ua avanoa mo tagata lautele i ofisa o pisinisi tutotonu a le kamupani iloga o lo o tuuina atu auaunaga.

42. Faasologa o tau mo Auaunaga i Isi kamupani e Tuuina atu Auaunaga – O faasologa o tau ua faaee atu e le kamupani iloga e tuuina atu auaunaga i isi kamupani e tuuina atu auaunaga:

- (a) e tatau ona faatoai atu ma noatia i le faamaoniga a le Pule Faatonu ina ia tusa ai ma le fuaiupu 40; ma
- (b) e tatau ona tausisia ma so o se poloaiga ua faia e le Pule Faatonu e faatatau i ia faasologa o tau.

43. Taiala Faalauaitele mo Tulafono Faatonutonu o Faasologa o Tau-(1) E mafai e le Pule Faatonu ona tuuina atu se poloaiga e faia ai so o se taumafaiga i tulafono faatonutonu o faasologa o tau a kamupani e tuuina atu auaunaga lea e ogatasi ma lenei Tulafono, e aofia ai, ae le faatapulaaina i le, tulafono faatonutonu o tapulaa maualuga o tau, faapaleniina o fua faatatau ma isi faiga o tulafono faatonutonu e faavae i luga o tau.

(2) E lē tatau ona faatonutonuina e le Pule Faatonu faasologa o tau a se kamupani e tuuina atu auaunaga ina ia taofia ai le aiatatau a lena kamupani e maua ai se tupe maua talafeagai i tupe teu faafaigaluega a lea kamupani mo auaunaga o tulafono faatonutonu o faasologa o tau mo lea kamupani.

44. Suesuega e faia i tau-(1) I le noatia ma le fai fuafua i le (3), e mafai e le Pule Faatonu ona tuuina atu se poloaiga e manaomia ai le saunia e se kamupani iloga e tuuina atu auaunaga ma isi kamupani maoti e tuuina atu auaunaga, e faatoai pe auai atu i se isi uiga i le atiaeina o se duesuega e faia i tau o auaunaga tau fesootaiga le kamupani iloga e tuuina atu auaunaga pe afai ua fuafua e le Pule Faatonu e faapea o le a avea ma faiga aupito sili ona lelei ma talafeagai e puipuia ai amio e taofiofia ai faiga faatauva po o se isi faiga e aupito i lelei ma talafeagai i le faia o o so o se polokalame o le faasologa o tau.

(2) Afai ua manaomia e le Pule Faatonu se kamupani e tuuina atu auaunaga e sauni po o le faatoai atu po o le auai atu i se isi faiga i le atiaeina o se duesuega e faia i tau:

- (a) e tatau i le kamupani o lo o tuuina atu auaunaga ona faatoai atu i le Pule Faatonu se duesuega o tau o le tuuina atu o vaega o auaunaga eseese a le kamupani o lo o tuuina atu auaunaga;

- (b) e tatau i le Pule Faatonu ona tuuina atu se poloaiga i faatulagaga o tau, faiga, taumafaiga, taualumaga ma le umi o le suesuega o tau; ma
 - (c) o le faamoemoega o le suesuega o tau ina ia fuafua ai tau i kamupani e tuuina atu auaunaga mo le tuuina atu o ituaiga auaunaga eseese tau fesootaiga.
- (3) E tatau i le Pule Faatonu ona feutagai ma so o se kamupani e tuuina atu auaunaga lea e talosagaina e le Pule Faatonu e manaomia e saunia pe faatoai atu se suesuega o tau a o lumanai ai le faia e le Pule Faatonu o se poloaiga i lalo o le faafuaiupu (1).

45. Auala o le Faatonutonuina o tapulaa maualuga o tau-(1) I le noatia ma le fai fuafua i le faafuaiupu (4), e mafai e le Pule Faatonu ona tuuina atu se poloaiga e manaomia ai se kamupani e tuuina atu auaunaga e talosaga pe auai atu i se isi faiga i le atiaeina o se auala e faatonutonuina ai tapulaa maualuga o tau.

(2) Afai ua manaomia e le Pule Faatonu se kamupani e tuuina atu auaunaga e talosagaina ai se auala e faatonutonu ai tapulaa maualuga o tau:

- (a) e tatau i le kamupani o lo o tuuina atu auaunaga ona faatoai i le Pule Faatonu se talosaga mo le faia o se auala e faatonutonu ai le tapulaa maualuga o tau o auaunaga o faasologa o tau a le kamupani o lo o tuuina atu auaunaga; ma
 - (b) e tatau ona faailoa i le talosaga le faasologa o tau o lo o talosagaina mo auaunaga talafeagai, faavaegaina ua talosagaina po o vaega, le talosaga o alafua o tapulaa maualuga o tau mo tulafono faatonutonu o tapualaa maualuga o tau.
- (3) E mafai e le Pule Faatonu ona tuuina atu se poloaiga:
- (a) e faatonuina ai taiala mo le atinae o se fuafuaga mo se auala e faatonutonu ai tapulaa maualuga o tau; po o
 - (b) e faatulaga ai faatonuga mo nisi atinae o se fuafuaga ua faatoai i le Pule Faatonu.
- (4) E tatau i le Pule Faatonu ona feutagai ma le kamupani o lo o tuuina atu auaunaga lea e talosaga e le Pule Faatonu e

manaomia ai le talosagaina o se auala e faatonutonuina ai tapulaa maualuga o tau a o lumanai ai le faia e le Pule Faatonu o se poloaiga i lalo o le faafuaiupu (1).

VAEGA IX
FAIĀ A KAMUPANI O LO O TUUINA ATU
AUAUNAGA MA TAGATA O LO O FAAAOGĀINA
AUAUNAGA

46. Faaaogāina-(1) I le noatia ma le fai fuafua i le faafuaiupu (2), e tatau ona faaaogāina aiaiga o fuaiupu ua taua mulimuli ane o lenei Vaega ma na o le SamoaTel ma ana kamupani ma so o se isi kamupani ua laiseneina mo auaunaga ua laiseneina mo auaunaga tau telefoni masani:

- | | | |
|----------------|---|--|
| (a) Fuaiupu 52 | - | Faitioga a Tagata o lo o
Faaaogāina auaunaga |
| (b) Fuaiupu 54 | - | Faamatalaga o auaunaga |
| (c) Fuaiupu 55 | - | Faamatalaga faatatau i
Tuutuuga o auaunaga |
| (d) Fuaiupu 56 | - | Tusi Telefoni |
| (e) Fuaiupu 57 | - | Tulaga maualuga o
Auaunaga; ma |
| (f) Fuaiupu 58 | - | Avanoa i Nofoaga o
Tagata o lo o Faaaogāina
Auaunaga |

(2) Afai ua manatu le Pule Faatonu e faapea ua ogatasi se teuteuga po o se manaoga ma aiaiga o lenei Tulafono, e mafai e le Pule Faatonu, e ala i se poloaiga ona:

- | | |
|-----|---|
| (a) | teuteu aiaiga o lenei Vaega lea e faaaogā i le
SamoaTel ma ana kamupani ma so o se isi lava
kamupani ua laiseneina o auaunaga tau telefoni
masani; ma/po o |
| (b) | manaomia so o se kamupani e tuuina atu auaunaga
ia tausisia aiaiga ua filifilia o lenei Vaega ma, i
sea faatulagaga, e mafai ona fuafua ituaiga
auaunaga ia e tatau ona faaaogāina i ai ia aiaiga
ua filifilia. |

47. Faiga sagatonu e tagofia ai mataupu-(1) E faatoa mafai lava ona totogi e se tagata o lo o faaaogāina auaunaga i se

kamupani o lo o tuuina atu auaunaga se tupe mo auaunaga maoti tau fesootaiga po o mea faigaluega ia na talosagaina e le tagata o lo o faaaogāina auaunaga. E le tatau i le tagata o lo o faaaogāina auaunaga ona noatia e totogi mo so o se auaunaga tau fesootaiga po o mea faigaluega e le i talosagaina e le tagata o lo o faaaogāina auaunaga.

(2) E tatau i kamupani e tuuina atu auaunaga ona tuuina atu i tagata o lo o faaaogāina auaunaga pepa aitalafu:

- (a) tusitusia (e ui lava e mafai ona tuuina atu faaeletoroni pe afai e malie i ai le tagata e faaaogāina auaunaga);
- (b) i se faiga masani;
- (c) i se faatulagaina lelei ma faigofie;
- (d) lea e tuuina atu ai faamatalaga sa'o e uiga i auaunaga ia e tuuina atu ma le aofai ua tatau ona totogi mo auaunaga taitasi;
- (e) o lo o taua manino ai le faiga e faatatauina ai le faasologa o tau mo so o se auaunaga ia o lo o faavae ai pepa o tupe totogi i le umi o talanoaga i telefoni po o isi fua faatatau o le faaaogāina; ma
- (f) o lo o usitaia ai lenei Tulafono ma so o se isi tulafono faatonutonu, tulafono faafoe ma poloaiga e tagofia ai pepa o tupe totogi a tagata faatau.

(3) E tatau ona tausia e kamupani e tuuina atu auaunaga faamaumauga atoatoa o pepa o tupe totogi a tagata faatau uma mo se vaitaimi e le itiiti ifo i lo le 6 masina mai le aso e tatau ai ona totogi ma ia faavanoa ia faamaumauga i le Pule Faatonu pe a talosagaina.

(4) Afai e i ai se popolega o le Pule Faatonu e uiga i faiga po o faatinoga o tupe totogi o auaunaga, e mafai e le Pule Faatonu ona manaomia kamupani e tuuina atu auaunaga ina ia lomia faasalalau faamatalaga o faiga po o faatinoga o tupe totogi po o le faia o isi laasaga e faasino i se faiga po o faatinoga o lo o totogi ai tupe a le kamupani e tuuina atu auaunaga e pei ona manatu ai le Pule Faatonu ua talafeagai.

(5) E lē tatau i se kamupani e tuuina atu auaunaga ona faia, pe faapogai ina ia faia, so o se talosaga po o se fautuagga sese pe taufaase e uiga:

- (a) i le maua o avanoa, tau po o le tulaga manaomia o auaunaga po o meafaigaluega tau fesootaiga a le kamupani e tuuina atu auaunaga; po o
- (b) auaunaga po o meafaigaluega tau fesootaiga a se isi kamupani e tuuina atu auaunaga.

(6) Mo faamoemoega o le fuaiupu 47(5), e tau faasese se talosaga po o se fautuaga pe afai, i le taimi na faia ai le talosaga po o fautuaga, sa silafia pe sa tatau ona silafia i se itu talafeagai e le kamupani e tuuina atu auaunaga e faapea o sea talosaga po o sea fautuaga e sese pe taufaasese i so se itu iloga po o lea talosaga po o fautuaga sa talafeagai ai le faaono faafaigata ai pe faasese ai le tagata lea sa faia i ai le talosaga po o manatu.

(7) E mafai e le Pule Faatonu ona tuuina atu se poloaiga ina ia faatonutonu pe faasaina ai ona faaaogā e so o se tagata, po o sea tagata o ia na te tuuina atu auaunaga pe leai, fetaulaiga tau fesootaiga a se kamupani e tuuina atu auaunaga ina ia tuuina atu fesootaiga e aunoa ma se totogi, i le tulaga e faapea ua manatu ai le Pule Faatonu o sea poloaiga ua alagatatau ina ia faaitiitia pe taofia ai le amioga sese ua faia i sea fesootaiga.

(8) Po o fea lava e tulai mai ai se feteenaiga i le va o le faauigaina ma le faaaogāina o so o se aiaiga o lenei Tulafono ma le Tulafono o Faamatalaga Tau i Oloa o lo o Faaaogāina e Tagata o le Atunu 1988 po o le Tulafono o Fefatauaiga Talafeagai 1998, e tatau ona faauigaina ma faatatauina aiaiga o lenei Tulafono ina ia faaaogāina nai lo ia Tulafono.

48. Agatapuia o Faamatalaga e faasino i Tagata o lo o Faaaogāina Auaunaga-(1) I le noatia ma le fai fuafua i lenei Tulafono e le tatau i se kamupani e tuuina atu auaunaga ona faailoa atu faamatalaga e uiga i se tagata o lo o faaaogāina auaunaga e aunoa ma se faatanaga tusitusia a le tagata e faaaogāina auaunaga, pe seia vagana o le faailoa atu ua manaomia pe faatagaina e le Pule Faatonu po o le tulafono.

(2) I luga o se talosaga, ua faatagaina le tagata e faaaogāina auaunaga ina ia asiasi so o se faamaumauga a le kamupani o lo o tuuina atu auaunaga e uiga i auaunaga a le tagata e faaaogāina. E tatau i se tagata e faaaogāina auauanaga ona i ai lona aiatatau e manaomia ai e faapea so o se faamatalaga a le tagata e faaaogāina auaunaga e uiga i lea tagata o lo o teuina i totonu o

se faamaumauga a se kamupani e tuuina auaunaga e faapea e mafai e le tagata e faaaogāina auaunaga ona faailoa atu e sese, e ao ona faasaonia pe aveesea e le kamupani e tuuina atu auaunaga.

(3) I le noatia ma le fai fuafua i le faafuaiupu (4), o faamatalaga maoti uma o tagata e faaogaina auaunaga, aemaise ai o fautuaga e fesoottai ma tupe totogi, e tatau ona tausia e se kamupani e tuuina atu auaunaga mo na o faamoemoega o tupe totogi, po o isi faamoemoega faaletulafono, ma tausia mo le na o le umi e faatagaina ai i se tulafono faafoe po o se poloaiga ua faia e le Pule Faatonu, po o ua faatagaina i se isi faiga e ese ai e le tulafono.

(4) E mafai e se kamupani e tuuina atu auaunaga, faatasi ai ma le faamaoniga tusitusia a le Pule Faatonu ona faaaogāina faamatalaga maoti o tagata e faaaogāina auaunaga mo faamoemoega e ese mai nai lo faamatalaga o lo o faatulagaina mai i totonu o le faafuaiupu (3), e aofia ai, ae le faatapulaa i, maketiina ma le faatauina atu o auaunaga faaopoopo.

49. Agatapuia o Fesootaiga e faasino i Tagata o lo o Faaaogāina auaunaga-(1)

E tatau i kamupani e tuuina atu auaunaga ona faia laasaga uma talafeagai e faamautu ai le agatapuia mo fesootaiga a tagata e faaaogāina auaunaga.

(2) E lē tatau i kamupani e tuuina atu auaunaga ona faalavelave, mataitu, suia pe fetuunai vaega o lo o i totonu o se fesootaiga a le tagata e faaaogāina auaunaga, vagana ai e pei ona aiaia i totonu o le faafuaiupu (3), po o fuaiupu 69 ma le 70 po o se isi tulaga e ese ai i totonu o lenei Tulafono.

(3) Mo faamoemoega mo le sueina ma le mauaina o se mafuaaga o le faaaogāina le tatau faasolitulafono pe le tusa ai ma le tulafono, po o e pei ona aiaia i lalo o tulafono a Samoa.

(a) e mafai e se tagata e faaaogāina auaunaga ona faia se talosaga tuusao i se kamupani e tuuina atu auaunaga ina ia mataitu le faaaogāina o le telefoni a le tagata o lo o faaaogāina auaunaga;

(b) afai ua le faamalieina se tagata e faaaogāina auaunaga e faapea o le kamupani e tuuina atu auaunaga o lo o mataituina telefoni atu i le tagata o lo o faaaogāina auaunaga, e mafai e le tagata o

lo o faaaogāina auaunaga ona talosaga ina ia tuuina atu se kamupani e tuuina atu auaunaga ina ia mataitu le telefoni atu i le telefoni a le tagata e faaaogāina auaunaga;

- (c) e mafai e le Pule Faatonu po o se isi pulega ua faatagaina i se taimi vave i totonu o Samoa ona faatonu se kamupani e tuuina atu auaunaga ina ia mataitu telefoni atu ma le telefoni mai i le telefoni a le tagata e faaaogāina auaunaga ma e tatau i le kamupani e tuuina atu auaunaga ona usitaia so o sea faatonuga;
- (d) e tatau i le kamupani e tuuina atu auaunaga ma tuuina atu i le Pule Faatonu po o se isi pulega ua faatagaina i lea lava taimi i totonu o Samoa le faamatalaga ua maua mai le mataiuina e le kamupani e tuuina atu auaunaga o le telefoni a le tagata e faaaogāina auaunaga e aofia ai numera o telefoni o lo o faalavelave, solitulafono pe e le tusa ai ma le tulafono faapea ma taimi ma aso e faia ai ia telefoni; ma
- (e) e mafai e le Pule Faatonu ona faia so o se gaoioiga talafeagai e puipua ai tagata lautele ma le faia o telefoni e faalavelaveina, solitulafono pe le tusa ai ma le tulafono e tusa ai o lenei Tulafono, ma afai e talafeaigai ai, e tuuina atu le mataupu i isi pulega talafeagai mo isi gaoioiga.

50. Puipua o Faamatalaga tau le tagata lava ia-(1) E tatau i le kamupani e tuuina atu auaunaga ona nafa ma faamatalaga o le tagata e faaaogāina auauanaga ma fesootaiga a tagata e faaaogāina auaunaga i le puipuiga po o le faafoega a le kamupani e tuuina atu auaunaga po o sooupu a le kamupani e tuuina atu auaunaga.

(2) E tatau i le kamupani e tuuina atu auaunaga ona faagaioia le fetaulaiga o fesootaiga a le kamupani e tuuina atu auaunaga i le amanaiaina o le puipuiga patino o tagata o lo o faaaogāina auaunaga a kamupani o lo o tuuina atu ia auaunaga. Vagana ai ua faatagaina pe manaomia e le tulafono, pe faatasi ai ma le maliega a le tagata o ia lea o lo o faasino i ai faamatalaga

tau i le tagata lava ia, e lē tatau i se kamupani e tuuina atu auaunaga ona aoina, faaaogāina, tausia pe faailoa atu faamatalaga a le tagata e faaaogāina auaunaga mo so o se faamoemoe.

(3) O faamoemoega ia o lo o aoina ai faamatalaga a tagata e faaaogāina auaunaga e kamupani o lo o tuuina atu auaunaga e tatau ona faailoa i po o a o lumanai le aoina, ma e lē tatau i se kamupani e tuuina atu auaunaga ona, i le noatia ma le fai fuafua i lenei fuaiupu aoina, faaaogāina, tausia pe faailoa atu faamatalaga o le tagata e faaaogāina auaunaga mo faamoemoega e le o faailoaina atu.

(4) E tatau i kamupani e tuuina atu auaunaga ona faamautu e faapea e sao faamatalaga a tagata o lo o faaaogāina auaunaga, atoatoa ma ua tuuina i le taimi aupito lata mai mo faamoemoega e ao ona faaaogāina ai ia faamatalaga.

(5) E tatau i kamupani e tuuina atu auaunaga ona faamautu e faapea o faamatalaga o tagata o lo o faaaogāina auaunaga ma fesootaiga a tagata o lo o faaaogāina auaunaga ua puipuia e puipuigamalu talafeagai i le tulaga maaleale o ia faamatalaga ma fesootaiga.

51. Avanoa e maua e Pulega a le Malo – E leai se mea i totonu o lenei Tulafono e tatau ai ona faauigaina ina ia faasaina pe faalavelave i aiatatau a le Malo, Ofisa Sooupu a le Malo ma Pulega i le faatinoina o a latou aiatatau e avanoa a i isi tulaga e ese ai i faamatalaga tapuaia po o fesootaiga e faasino i se tagata o lo o faaaogāina auaunanga. E tatau ona faia avanoa e tusa ai o tulafono a Samoa.

52. Faitioga a Tagata o lo o Faaaogāina Auaunaga-(1) E tatau i kamupani e tuuina atu auaunaga ona faailoa se tagata maoti po o vaega o tagata e taliaina faitioga mai tagata e faaogaina auaunaga e ese mai i kamupani e tuuina atu auaunaga.

(2) E tatau i kamupani e tuuina atu auaunaga ona faavaeina taualumaga e tagofia ai faitioga a tagata e faaaogāina auaunaga e ese mai ai i kamupani e tuuina atu auaunaga. E tatau i taualumaga ma so o se teuteuga e faasino i ia mea ona noatia i le faamasinoga a le Pule Faatonu. E tatau ona faasalalau taualumaga i se faiga lelei ua faamaonia e le Pule Faatonu.

(3) O ni feeseseseaiga i le va o se kamupani e tuuina atu auaunaga ma se tagata e faaaogāina auaunga, po o le va o kamupani e tuuina atu auaunaga, e faapea e le mafai ona faia i ai se faaiuga a ia vaega ia i latou lava, e tatau ona noatia ma fai fuafua i fuaiupu 71, 72 ma le 73.

(4) E lē tatau i kamupani e tuuina atu auaunga ona motusia pe suia i se tulaga e ese ai so o se auaunaga ma e faapea o le mataupu o se faitioga po o se feeseseseaiga, e ese mai na i lo tuutuuga o Auaunaga ua faamaonia e le Pule Faatonu e tusa ai ma le fuaiupu 54 po o e pei ona faatagaina i se poloaiga ua faia e le Pule Faatonu.

53. E leai se Faailoga tagata le faavaea-(1) Vagana ai ua faatagaina i se tulaga maoti e ese ai e le Pule Faatonu, e tatau i kamupani iloga o lo o tuuina atu auaunaga ona ofoina atu i tagata uma e faaaogāina auaunaga tuutuuga tutusa ma tulaga aupito manaomia i auaunaga, e aofia ai le faasologa o tau e totogi, vagana ai e eesee tuutuuga moni ua faamaonia, e faavae i luga o eseesega i tuutuuga ua tuuina atu, e aofia ai tau esesee e totogi po o le utiuti o fale ma nofoaga po o punaoa.

(2) E tatau i so o se kamupani iloga e tuuina atu auaunga ona noatia i le faamaonia o so o se tuutuuga ma tulaga aupito manaomia e esesee i lalo o le faafuaiupu (1) ina ua faamleiina le Pule Faatonu, po o ina ia taofia le faatinoga i luga o le maua o se poloaiga mai le Pule Faatonu e manaomia ai le kamupani iloga e tuuina atu auaunaga ina ia faapea ona faia.

54. Tuutuuga o Auaunaga-(1) E mafai e le Pule Faatonu ona tuuina atu se poloaiga e manaomia ai se kamupani e tuuina atu auaunaga ina ia faaoo atu se ata faataitai o Tuutuuga o Auaunaga i le Pule Faatonu mo le faamaonia. E tatau i le poloaiga ona faaalia maoti ma le faamatalaga mo sauniuniga, faamaoniga ma le faatinoga o Tuutuuga o Auaunaga.

(2) E ao i le Ata Faataitai o Tuutuuga o Auaunga ona ogatasi ma lenei Tulafono, o tulafono faafoe, tuutuuga o laisene ma poloaiga ua faia i le Pule Faatonu, ma e tatau ona faamatalaina ai tuutuuga faavae o le fesootaiga pisinisi i le va o kamupani e tuuina atu auaunaga ma latou e faaaogāina

auaunaga a le kamupani e tuuina atu auaunaga i le tuuina atu ma le faaaogāina o auaunaga tau fesootaiga.

(3) E tatau i le Pule Faatonu ona ia faamaonia uma ia ata faataitai o Tuutuuga o Auaunaga, faatasi ai ma ni suiga e faia e le Pule Faatonu pe leai foi, ina ua uma ona feutagai ma le kamupani e tuuina atu auaunaga ma isi vaega e aia i ai, e pei ona faatatauina e le Pule Faatonu. A faamaonia loa, e tatau loa i nei Tuutuuga o Auaunaga ona suitulaga i Tuutuuga o Auaunaga o lo o faaaogāina i le taimi lea e se kamupani e tuuina atu auaunaga ma e tatau ona noatia ai le kamupani e tuuina atu auaunaga ma latou e faaaogāina auaunaga a le kamupani.

(4) E mafai e le Pule Faatonu ona tuuina atu se poloaiga e faamuta ai se manaoga mo kamupani e tuuina atu auaunaga ina ia tuuina atu ata faataitai o Tuutuuga o Auaunaga i le Pule Faatonu mo faamaoniga pe afai ua fuafuaina e le Pule Faatonu e faapea o sea faamaoniga ua le toe manaomia mo le puipuia o aia a latou e faaaogāina auaunaga.

55. Faamatalaga e uiga i Tuutuuga o Auaunaga-(1) E tatau i se kamupani e tuuina atu auaunaga ua lautogia e tusa ai o le fuaiupu 46 ona tausia i taimi uma i totonu o le tuatusi faakomepiuta a le kamupani e tuuina atu auaunaga, i le gagana Samoa ma le gagana Peretani, ia faamatalaga ua taua i lalo:

- (a) le faamatalaga o lo o i ai nei o Tuutuuga o Auaunaga a le kamupani e tuuina atu auaunaga;
- (b) ia faasologa uma o tau ua faamaonia a le kamupani e tuuina atu auaunaga faatasi ai ma suiga o le faasologa o tau ua fuafuaina ia ua uma ona tuuina atu i le Pule Faatonu, e tusa ai ma le fuaiupu 40;
- (c) le tuatusi faakomepiuta aloaia ma isi faamatalaga e fesootai ai le kamupani ma le Pule Faatonu faatasi ai ma se faamatalaga manaomia e faapea o le kamupani o lo o tuuina atu auaunaga o lo o faatonutonu e le Pule Faatonu i lalo o lena Tulafono ma e mafai e latou e faaaogāina auaunaga ma isi kamupani e tuuina atu auaunaga ona fesootai atu i le Pule Faatonu pe afai ua latou

lē mafaia ona foia ni feeseseaiga ma latou e tuuina atu auaunaga; ma

- (d) se faiga faasinoala faigofie malamalama e mafai ai e le tagata e faaaogaina auaunaga ona su'e ni faamatalaga ua taua i luga.

(2) E tatau i se kamupani e tuuina atu auaunaga ua lautogia i lalo o le fuaiupu 46 ona tausia ata pepa o lo o i ai nei o Tuutuuga o Auaunaga a le kamupani e tuuina atu auaunaga, ana faasologa o tau ua faamaonia ma isi o lo o faatali faatasi ai ma isi faamatalaga ua faamatalaina i le faafuaiupu (1)(c) i ofisa aloaia uma o pisinisi a le kamupani e tuuina atu auaunaga, ma e tatau ona faaavanoa ia pepa aloaia mo asiasiga a tagata lautele, e aunoa ma se tau, i taimi masani o pisinisi.

(3) Pe afai e manaomia i se poloaiga a le Pule Faatonu, e tatau i le kamupani e tuuina atu auaunaga ona tuu ia le ata o lo o i ai nei o Tuutuuga o Auaunaga a le kamupani e tuuina atu auaunaga, se faamatalaga faatatau i ata o faasologa o tau ua faamaonia ma faasologa o tau o lo o faatali a le kamupani e tuuina atu auaunaga ia e mafai ona maua mo le asiasi i ofisa pisinisi o le kamupani e tuuina atu auaunaga faatasi ai ma i si faamatalaga o lo o faamatala mai i le faafuaiupu (1)(c) i pepa faatonuina o so o se tusi telefoni ua lomia faasalalau e le kamupani e tuuina atu auaunaga po o le avea ai ma ona sui.

(4) E tatau i se kamupani ua lautogia i lalo o le fuaiupu 46 ona tuuina atu i luga o se talosaga ma i se tau talafeagai, ata pepa o faamatalaga o faasologa faamaonia o tau i so o se tagata e faaaogāina auaunaga na te talosaga ia vaega.

56. Tusi Telefoni – Pe afai e manaomia e se poloaiga a le Pule Faatonu, e tatau i se kamupani e tuuina atu auaunaga ona tuuina atu se tusi telefoni i tagata e faaaogāina auaunaga e tusa ai ma tuutuuga ma aiaiga e pei ona mafai e le Pule Faatonu ona filifilia i totonu o le poloaiga mai lea taimi i lea taimi.

57. Tulaga Aupito Manaomia o Auaunaga-(1) E tatau i se kamupani e tuuina atu auaunaga ua lautogia i lalo o le fuaiupu 46 ona tuuina atu auaunaga tau fesootaiga ia e faafetaiaia ai tulaga aloaia o auaunaga lelei. E tatau i le Pule Faatonu ona atiae nei tulaga aloaia i le feutagai ai ma le

kamupani e tuuina atu auaunaga ma e mafai ona tuuina i totonu o le laisene mo le kamupani e tuuina atu auaunaga e faatuina i le poloaiga a le Pule Faatonu.

(2) E mafai e le Pule Faatonu ona teuteu, faaopoopo pe aveese tulaga aloaia o tulaga lelei o auaunaga ua faatuina e tusa ai o le faafuaiupu (1), i le maea ai o feutagaina ma le kamupani e tuuina atu auaunaga ua aafia ai.

(3) Afai ua faatuina tulaga aloaia o auaunaga lelei e tusa ai o le faafuaiupu (1), e tatau i se kamupani e tuuina atu auaunaga ona auina atu lipoti tusitusia i le Pule Faatonu i kuata taitasi, e tusa ai ma vaega ua taua mulimuli mai:

(a) e tatau i lipoti o tulaga lelei o auaunaga ona:

(i) faia i se pepa faatumu e fuafuaina e le Pule Faatonu; ma

(ii) faatulaga mai ai faaiuga tonu a le kamupani e tuuina atu auaunaga mo tulaga aloaia taitasi uma o auaunaga lelei; ma

(b) I le tulaga o se lipoti o tulaga lelei o auaunaga o lo o faaalia ai e faapea e le i ausia se tulaga aloaia, e tatau i le kamupani e tuuina atu auaunaga ona tuuina atu se faamalamalamaga i le Pule Faatonu pe aisea ua le ausia ai lea tulaga aloaia ma po o a laasaga patino ua faia e le kamupani e tuuina atu auaunaga po o ua ia fuafua e fai ina ia ausia ai lea tulaga aloaia.

(4) E tatau i le Pule Faatonu ona logo se kamupani o lo o tuuina atu auaunaga, i totonu o le tolusefulu (30) aso talu ona taliaina so o se lipoti o tulaga aupito manaomia o auaunaga, pe talia e le Pule Faatonu le faamalamalamaga ua tuuina atu mo so o se tulaga faataatia lea sa le mafai ona ausia. Afai e le tali atu le Pule Faatonu i totonu o le vaitaimi e tolusefulu (30) aso, o lona uiga o le faamatalaga ua tuuina atu ua avea e faapea ua taliaina.

(5) Afai e lē taliaina e le Pule Faatonu le faamalamalamaga i lalo o le faafuaiupu (4), e tatau i le Pule Faatonu ona tuuina atu se poloaiga e faataoto ai laasaga faaopoopo e tatau ona faia e le kamupani o lo o tuuina atu auaunaga ma le taimi e tatau ai ona faia e le kamupani o lo o tuuina atu auaunaga ia laasaga ina ia ausia ia tulaga, e aofia ai ae le faatapulaaina i:

- (a) so o se manaoga faaopoopo tau lipoti e tatau i le kamupani o lo o tuuina atu auaunaga ona tausisia seja ausia lea tulaga; ma
- (b) o a, pe afai e i ai, tupe toe faafoi maoti po o isi taui mo tagata o lo o faaaogāina auaunaga e ono faatino e le kamupani o lo o tuuina atu auaunaga e avea o se taunuuga o le le mafai e le kamupani o lo o tuuina atu le auaunaga ona faafetaiai ia tulaga.

(6) Afai e faatoai e se kamupani o lo o tuuina atu auaunaga se lipoti i tulaga aupito i manaomia po o se mea faitino faaopoopo e faasino i ai i le Pule Faatonu, e tatau foi i le kamupani o lo o tuuina atu auaunaga ona lomia faasalalau le lipoti i le tuatusi faakomepiuta a le kamupani o lo o tuuina atu auaunaga. I le mauaina o se lipoti o auaunaga i tulaga aupito manaomia po o so o se meafaitino faaopoopo e faasino i ai mai se kamupani o lo o tuuina atu auaunaga, e tatau i le Pule Faatonu ona tuuina le lipoti i totolu o le tuatusi faakomepiuta aloaia a le Pule Faatonu.

(7) Afai ua faia se iuga e le Pule Faatonu e faapea e tatau ai mo le lelei o tagata lautele, e mafai e le Pule Faatonu ona manaomia se kamupani o lo o tuuina atu auaunaga ina ia lomia faasalalau i le gagan Samoa ma le gagana Peretania i le Savali ma se isi nusipepa o lo o faasalalauina i totolu o Samoa le lipoti atoa a le kamupani o lo o tuuina atu auaunaga po o vaega o le lipoti e uiga i tulaga aupito manaomia o auaunaga faapea manaoga tau lipoti a le Pule Faatonu.

58. Avanoa i Nofoga o Tagata o lo o faaaogāina auaunaga-(1) O noataga o auaunaga a se kamupani o lo o tuuina atu auaunaga ua faatulagaina e tusa ai ma le fuaiupu 46 e tatau ona faaalautele atu i le faapipiina, faafoeina, tausiga ma le toe faafouina o nofoga tau fesootaiga ina ia lelei mo le faia o galuega ia o lo o umia pe tuuina atu e le kamupani o lo o tuuina atu auaunaga ma faatu i luga o meatotino a le tagata o lo o faaaogāina le auaunaga.

(2) E tatau i se kamupani o lo o tuuina atu auaunaga ona i ai le aiatatau e ulufale ai i se nofoga o tagata o lo o faaaogāina le auaunaga pe afai o nofoga ma fale tau fesootaiga a le

kamupani o lo o tuuina atu auaunaga e i totonu o nofoaga o le tagata o lo o faaaogāina le auaunaga i luga o tuutuuga ua taua e faapea:

- (a) ua uma ona tuuina atu e le kamupani o lo o tuuina atu auaunaga se faasilasilaga tatau i le tagata o lo o faaaogāina le auaunaga e tusa ai o tulaga aliae mai;
- (b) e auina atu e le kamupani e tuuina atu auaunaga na o tagata faigaluega ua faailoaina manino ma tgata agavaa;
- (c) ua maua e le kamupani o lo o tuuina atu auaunaga le maliega a le tagata o lo o faaaogāina auaunaga mo sea avanoa; ma
- (d) e le soona aiā tagata faigaluega a le kamupani o lo o tuuina atu auaunaga i gaoioiga, fale ma meatotino a le tagata o lo o faaaogāina auaunaga.

59. Noataga, Tupe toe faafoi ma Taui – E mafai e le Pule Faatonu ona faia se poloaiga po o se tulafono faafoe e faave ai aiaiga e faatatau i noataga a, tupe toe faafoi e ma taui e totogi atu e kamupani o lo o tuuina atu auaunaga i tagata o lo o faaaogāina auaunaga.

VAEGA X **MEAFAIGALUEGA TAU FESOOFTAIGA**

60. Meafaigaluega tau Fesootaiga-(1) E mafai e le Pule Faatonu ona tuuina atu se poloaiga e faia ai se tasi po o le sili atu o vaega ua taua e faapea:

- (a) faia se faaiuga e faapea o nisi ituaiga o meafaigaluega tau fesootaiga ua fautuaina e faapipii i fetaulaiga o fesootaiga o lo o faaaogāina e tuuina atu ai auaunaga tau fesootaiga i tagata lautele e manaomia le faamaoniga mo sea faiga e faapipii ai;
- (b) lomia faasalalau aiaiga aloaia mo faamaoniga ma faavae ia tulaga aloaia mo faamaoniga o meafaigaluega tau fesootaiga mo le faaaogāina i

auaunaga tau fesootaiga po o fetaulaiga o fesootaiga;

- (c) faailoa manino faalapotopotoga i totonu o le atunu
po o i atunu i fafo po o nofoaga mo suesuega
mo le faamaonia o meafaigaluega tau fesootaiga
mo le faaaogāina i auaunaga tau fesootaiga po o
fetaulaiga o fesootaiga; ma
- (d) tausia se tusi lesitala o ituaiga meafaigaluega ua
faamaonia mo fesootaiga, aiaiga aloaia mo
faamaoniga ma tulaga aloaia mo faamaoniga.

(2) O le maketiina po o le faatauina atu o meafaigaluega tau fesootaiga e le noatia i se faatagaga vagana ai e pei ona aiaia i tototnu o lenei fuaiupu.

(3) E mafai e le Pule Faatonu ona faia se maliega autasi ma pulega i isi atunu e aiaia ai le aloaia o, faamaoniga ma le faamaonia o meafaigaluega tau fesootaiga i isi atunu ma/po o Samoa.

VAEGA XI **FUAINUMERA**

61. Fuafuaga mo le Faanumeraina i totonu o le Atunu-(1) E ala i se poloaiga, e tatau i le Pule Faatonu ona saunia, lomia faasalalau ma pulea se Fuafuaga mo le Faanumeraina i totonu o le Atunu ma e tatau ona faasoasoa ai fuainumera ma le faasologa o fuainumera i kamupani e tuuina atu auaunaga ma tagata e faaaogāina auaunaga ina ia tusa ai ma le Fuafuaga o le Faanumeraina i totonu o le Atunu.

(2) I le saunia ma le pulea o le Fuafuaga a le Atunu mo le Faanumeraina i totonu o le Atunu e tatau i le Pule Faatonu ona amanaia le faasoaina ma le faasologa o lo o i ai i le taimi nei o fuainumera.

(3) E tatau ona amanaia i le Fuafuaga le Faanumeraina i totonu o le Atunu so o se tulafono faatonutonu o i ai i le taimi nei po o ua fautuaina mo le faavaeina o totogifuapauina mo fuainumera tau fesootaiga i lalo o le fuaiupu 10.

(4) E mafai e le Pule Faatonu ona faia fesuiaina i le Fuafuaga mo le Faanumeraina i totonu o le Atunu e ala i le lomia faasalalau o se faasilasilaga i tagata o lo o faaaogāina

auaunaga ma kamupani o lo o tuuina atu auaunaga i se taimi talafeagai a o lumanai le aso e faamamaluina ai fesuiaiga.

(5) E tatau ona ogatasi le Fuafuaga o le Faanumeraina i totonu o le Atunu ma manaoga o maliega faava o malo, noataga, feagaiga, tulafono faatonutonu ma fautuaga ia ua i ai le maliega aloaia a Samoa po o lo o noatia ai i se isi tulaga e ese ai.

(6) E tatau ona manaomia uma kamupani o lo o tuuina atu auaunaga ina ia faaaogā fuainumera ua faasoa ia i latou e le Pule Faatonu ina ia tusa ai ma le Fuafuaga mo le Faanumeraina i totonu o le Atunu ma e tatau ona faamautu e faapea o nei fuainumera o lo o faaaogāina i se tulaga lelei atoatoa ma ina ia tusa ai ma le Fuafuaga o le Faanumeraina i totonu o le Atunu.

62. Faaaogāina o Fuainumera-(1) E le tatau ona i ai ni aiatatau tau meatotino a kamupani o lo o ua tuuina atu auaunaga ma tagata e faaaogāina auaunaga i fuainumera.

(2) E tatau i se kamupani o lo o tuuina atu auaunaga ona faatoa suia se numera a se tagata o lo o faaaogāina auaunaga:

- (a) i luga o se talosaga a le tagata o lo o faaaogāina auaunaga;
- (b) pe afai ua suia le nofoaga mautu o le tagata o lo o faaaogina auaunaga;
- (c) pe afai o le suiga o lo o manaomia i le Fuafuaga a le mo le Faanumeraina i totonu o le Atunu; po o
- (d) pe afai e i ai ni mafuaaga tatau a le kamupani o lo o tuuina atu auaunaga mo le faia o lea suiga ma pe afai ua tuuina atu e le kamupani o lo o tuuina atu auaunaga se faasilasilaga tusitusia talafeagai e tuuina atu muamua i le tagata o lo o faaaogāina auaunaga lea e aafia ai, lea e taua ai le mafuaaga ma le aso ua faamoemoeina mo le suiga. I tulaga faanatinati, e tatau ona lava se faasilasilaga tuufofoga e faamaonia mulimuli ane i se faiga tusitusia.

63. Feaveaia o Numera-(1) E mafai e le Pule Faatonu, ina ua maea ona feutagai ma i latou o lo o tuuina atu auaunaga ua aafia ai ma isi vaega e aiā i ai, ona tuuina atu se poloaiga e

faatonu ai se toatasi po o le sili atu o latou o lo o tuuina atu auaunaga ina ia atiae po o ina ia fesoasoani i le atiaeina o se fuafuaga mo le faatinoga, mo faamaoniga ma le faatinoga e ala i se poloaiga a le Pule Faatonu.

(2) I le faia o se filifiliga pe e faatino le feaveaiga o fuainumera, e tatau i le Pule Faatonu ona amanaia tau o sea feaveaiga o numera faapea ma le mafai ona maua tulaga faatekonolosi e mafai ai ona faatino sea tulaga o le feaveaiga o numera i totonusi Samoa i se faiga e gafatia lona tau.

(3) O tau a le Pule Faatonu i le atiaeina ma le faaofiina mai o le feaveaiga o numera faapea tau faifaipea o le faafoeina o le feaveaiga o numera e tatau ona faaola mai e kamupani o lo o tuuina atu auaunaga ina ia tusa ai ma tulafono faafoe talafeagai po o poloaiga.

64. Filifiliga o Kamupani o lo o tuuina atu auaunaga-(1)

E mafai e le Pule Faatonu, ina ua maea ona feutagai ma kamupani ua laiseneina ma isi vaega e i ai ona tuuina atu se poloaiga e faatonu ai le toatasi po o le sili atu o kamupani o lo o tuuina atu auaunaga e atiae ai po o ina ia fesoasoani i le atiae o se faiga e filifilia ai kamupani e tuuina atu auaunaga po o se fuafuaga e filifilia ai muamua kamupani e tuuina atu auaunaga, mo le faamaoniaga ma le faatinoga e ala i poloaiga a le Pule Faatonu.

(2) I le iloiloina pe e faatino se filifiliga o kamupani e tuuina atu auaunaga po o le faia muamua o filifiliga o kamupani e tuuina atu auaunaga, e tatau i le Pule Faatonu ona amanaia tau o ia malosiaga ma le mafai ona maua tulaga faatekonolosi e mafai ai ma maua malosiaga faamoemoeina i se faiga gafatia o tau.

(3) O tau a le Pule Faatonu i le atiaeina ma le faavaeina o faiga e filifilia ai kamupani o lo o tuuina atu auaunaga po o le faia muamua o filifiliga o kamupani e tuuina atu auaunaga ma tau faifaipea o le faafoeina o le filifiliga o kamupani e tuuina atu auaunaga po o le filifilia muamua o kamupani e tuuina atu auaunaga e tatau ona toe faaola mai kamupani e tuuina atu auaunaga ina ia tusa ai ma tulafono faafoe po o poloaiga talafeagai.

VAEGA XII
AVANOA I MEATOTINO

65. Avanoa i Eleele, Nofoaga & Fale o le Malo-(1) Afai ua le mafai e se kamupani e tuuina atu auaunaga i luga o tuutuuga faapisinisi talafeagai ona:

- (a) maua mai se maliega a le Malo po o se Ofisa Sooupu a le Malo po o se Pulega e i ai le pulega faaletulafono i eleele o le Malo po o se nofoaga o le Malo ina ia fausia, tausia pe faatino ai ni nofoaga mo fetaulaiga o fesootaiga i luga o sea eleele po o nofoaga; po o
- (b) maua avanoa i se pou, avanoa e fai ai galuega, pou faailoilo po o isi fausaga lagolago o se fesootaiga, malosiaga tau eletise po o isi faiga mo faasalalauga ua fausia i luga o eleele o le Malo po o se nofoaga o le Malo, po o o lo o umia po o pulea e le Malo po o se Lala Sooupu o le Malo po o se Pulega,

e mafai e le kamupani o lo o ua tuuina atu auaunaga ona talosaga i le Pule Faatonu mo se fesoasoani.

(2) Ina ua maua se talosaga mo se fesoasoani e tusa ai o le faafuaiupu (1), e tatau i le Pule Faatonu ona feutagai ma le Malo, Lala Sooupu a le Malo po o le Pulega ma taumafai e saili se fofo e mafai ona taliaina faatasi e le kamupani e tuuina atu auaunaga ma le Malo, Lala Sooupu a le Malo po o le Pulega, i le a lava le tulaga e ono manaomia ai.

(3) Afai ua le mafai ona tuuina atu i gaoioiga a le Pule Faatonu i lalo o le faafuaiupu (2) ona maua ai se maliega i le va o vaega o lo o aafia ai:

- (a) e mafai e le Pule Faatonu ona faatino isi lava malosiaga i lalo o lenei Tulafono po o isi Tulafono, e pei ona manatu le Pule Faatonu ua talafeagai ai mo le foia o le mataupu; po o
- (b) e mafai ona tuuina atu le mataupu e le Pule Faatonu po o se vaega i le Komesina o Sulufaiga mo se poloaiga e faia e le Komesina o Sulufaiga ina ia tuuina atu pe teena ai le maliega manaomia po o le avanoa, i le a lava le tulaga o i ai, i luga o ia

tuutuuga ma aiaiga, e pei ona mafai ona faia i ai se faaiuga e le Komesina o Sulufaiga. I le faia o le faaiuga i le mataupu, e tatau i le Komesina o Sulufaiga ona amanaia:

- (i) sini o le Tulafono ua faatulaga mai i le fuaiupu 3;
- (ii) so o se talosaga e tuuina atu e le Pule Faatonu po o vaega;
- (iii) tuuina atu pe teena le maliega manaomia po o avanoa i vaega, tagata lautele ma so o se tagata e faaaogāina auaunaga a le kamupani e tuuina atu auaunaga; ma
- (iv) so o se isi mataupu talafeagai.

(4) O vaega e aofia i so o se poloaiga ua faia e le Komesina o Sulufaiga i lalo o le faafuaupu (3) e tatau ona latou usitaia lea poloaiga e faapei ai lea poloaiga o se poloaiga sa faia e le Pule Faatonu.

(5) Afai ua faia e le Komesina o Sulufaiga se poloaiga e faamatuu atu ai le faaaogāina o po o e avanoa ai i eleele o le Malo po o nofoaga ma fale i lalo o le faafuaiupu (3) e tatau i le Komesina o Sulufaiga ona faia ia aofia ai i totonu o le poloaiga le aofaiga o tupe e tatau ona totogi e le kamupani e tuuina atu auaunaga i le Malo e avea ma taui mo le faaaogāina o po o mo le avanoa o le kamupani e tuuina atu auaunaga i eleele po o nofoaga ma fale o le Malo.

66. Avanoa i Fanua Tumaoti ma Nofoaga-(1) Afai o se kamupani o lo o tuuina atu auaunaga:

- (a) ua ia manaomia se avanoa i fanua tumaoti po o nofoaga (e ese mai fanua faaleaganuu po o nofoaga o lo o i luga o fanua faaleaganuu) ina ia tuuina atu ai auaunaga tau fesootaiga; ma
- (b) ua le mafai, i luga o tuutuuga faapisinisi talafeagai, ona taunuu i se maliega mo sea avanoa faatasi ma le e ona le fanua tumaoti po o nofoaga tumaoti,

e mafai e le kamupani o lo o tuuina atu auaunaga ona talosaga i le Pule Faatonu mo se fesoasoani e le gata i le faia o se maliega ma le e ona le fanua tumaoti po o nofoaga ma fale tumaoti po o

mo le faatinoina o isi malosiaga ina ia mafai ona maua ai avanoa o lo o manaomia.

(2) I luga o le mauaina o se talosaga mo se fesoasoani e tusa ai ma le faafuaiupu (1), e tatau i le Pule Faatonu ona faia laasaga ua ia manatu e tatau ai ina ia soalaupule le mataupu i le va o itu o lo o aofia ai.

(3) Afai ua le manuia le taumafaiga a le Pule Faatonu i lalo o le faafuaiupu (2) ina ia maua se maliega i le va o itu o lo o aofia ai:

- (a) e mafai e le Pule Faatonu ona faatino isi lava malosiaga i lalo o lenei Tulafono po o isi Tulafono, e pei ona manatu le Pule Faatonu e talafeagai, ina ia maua ai se faaiuga o le mataupu; po o
- (b) e mafai ona tuuina atu le mataupu e le Pule Faatonu po o se vaega i le Faamasinoga Sili po o le Faamasinoga Faaitumalo ina ia faia e lea Faamasinoga se poloaiga, e tuuina atu ai pe teena ai le avanoa manaomia i luga o tuutuuga ma aiaiga e pei ona mafai ona fuafuaina e le Faamasinoga, i le amanaia ai o:
 - (i) le natura o le fanua tumaoti po o nofoaga tumaoti;
 - (ii) le natura o le avanoa o lo o manaomia;
 - (iii) le taua o sea avanoa i le faatumauina po o le faaleleia o auauanga tau fesootaiga mo Samoa;
 - (iv) pe mafai e so o se tupe totogi po o isi iloiloga ona tauia le e ona le fanua pe afai e poloaiina e le Faamasinoga lea avanoa;
 - (v) le aafiaga o le e ona ma isi tagata o lo o nofoia le elele po o nofoaga ma fale pe afai e poloaiina sea avanoa;
 - (vi) sini o le Tulafono ua faatulaga mai i totonu o le fuaiupu 3;
 - (vii) so o se talosaga e tuuina atu e le Pule Faatonu po o se vaega o lo o aofia ai; ma

(viii) isi lava mataupu e pei ona manatu le Faamsinoga e talafeagai ai.

(4) I le noatia ma fai fuafua i le faafuaiupu (5), pe afai ua faia e le Faamsinoga Sili po o le Faamsinoga Faaitumalo se poloaiga e faamatuu ai le avanoa i lalo o le faafuaiupu (3), e tatau i le Faamsinoga ona faia ia aofia ai i totonu o le poloaiga po o le a le taui (pe afai e i ai) e tatau ona totogi e le kamupani e tuuina atu auaunaga i le e ona le eelele tumaoti po o mafuaaga ma fale tumaoti.

(5) E tatau ona faaaogā aiaiga o le Tulafono o le Aveina o Eleele 1964 i lenei fuaiupu faatasi ma ni fesuiaga ma fetuunaiga e pei ona talafeagai ai.

67. Avanoa i Fanua Faaleaganuu ma Nofoaga ma Fale-(1) Afai o se kamupani e tuuina atu auaunaga:

(a) ua ia manaomia se avanoa e faaaogā ai fanua faaleaganuu po o nofoaga o lo o i luga o fanua faaleaganuu ina ia faia ai galuega tau fesootaiga; ma

(b) ua le mafai, i luga o tuutuuga faapisinisi talafeagai, ona taunu i se maliega mo sea avanoa faatasi ma le tagata e nafa ma le fanua faaleaganuu po o nofoaga,

e mafai e le kamupani e tuuina atu auaunaga ona talosaga i le Pule Faatonu mo se fesoasoani e le gata i le faia o se maliega ma le tagata e nafa ma le fanua faaleaganuu po o nofoaga po o mo le faatinoina o isi malosiaga ina ia mafai ona maua ai le avanoa o lo o manaomia.

(2) I luga o le mauaina o se talosaga mo se fesoasoani e tusa ai ma le faafuaiupu (1), e tatau i le Pule Faatonu ona faia laasaga ua ia manatu e tatau ai ina ia soalaupule le mataupu i le va o itu o lo o aofia ai.

(3) Afai ua le manuia le taumafaiga a le Pule Faatonu i lalo o le faafuaiupu (2) ina ia maua se maliega i le va o itu o lo o aofia ai:

(a) e mafai ona tuuina atu le mataupu e le Pule Faatonu po o se vaega o aofia ai i le Matagaluega o Punaoa Faalenatura ma le Siosiomaga po o le Faamsinoga o Fanua ma Suafa mo se faaiuga i

lalo o lenei Tulafono po o le Tulafono o le Faaliliuina o Eleele Faale Aganuu 1965 po o le Tulafono o le Aveina o Eleele 1964, po o isi Tulafono ma taualumaga o lo o tagofia e faasino i fanua faaleaganuu;

- (b) afai ua tagofia le mataupu i lalo o le parakalafa (a), e mafai e le Pule Faatonu ona tuuina atu fesoasoani tatau ai e manatu le Pule Faatonu ua talafeagai e avea ma vaega o taualumaga o lo o tagofia ai fanua faaleaganuu, e aofia ai le faia o se poloaiga e faamaonia ai pe o le faamoemoe o lo o manaomia ai le fanua po o nofoaga o se faamoemoega mo tagata lautele i lalo o le Tulafono o le Aveina o Eleele 1964; ma
- (c) e mafai e le Pule Faatonu ona faatino isi lava malosiaga i lalo o lenei Tulafono po o isi Tulafono e pei ona manatu le Pule Faatonu e talafeagai ina ia maua ai se faaiuga o le mataupu.

(4) E ui lava i so o se isi tulafono, afai o le mataupu ua i luma o le Faamasinoga o Fanua ma Suafa, e tatau ona i ai le pulega faaletulafono i le Faamasinoga e faia ai se poloaiga e faamatuu atu ai pe teena ai avanoa manaomia i luga o ia tuutuuga ma aiaiga e pei ona mafai e le Faamasinoga ona faia i ai se faaiuga, i le amanaia ai o:

- (a) le natura o fanua faaleaganuu po o nofoaga ma fale;
- (b) le natura o avanoa o lo o manaomia;
- (c) le taua o sea avanoa i le faatumauina po o le faaleleia o auaunaga tau fesootaiga mo Samoa;
- (d) le mafai e ni tupe totogi po o isi iloiloga ona taui ai le e ona pe afai e poloaiina e le Faamasinoga lea avanoa;
- (e) le aafiaga o le e ona ma isi tagata o lo o nofioia le fanua po o nofoaga pe afai e poloaiina sea avanoa;
- (f) sini o le Tulafono ua faatulaga mai i totonu o le fuaiupu 3;
- (g) so o se talosaga e tuuina atu e le Pule Faatonu po o vaega o lo o aofia ai; ma

(h) isi lava mataupu e pei ona manatu le Faamsinoga e talafeagai ai.

(5) I le noatia ma le fai fuafua i le faafuaiupu (6), i le faia ai e le Faamsinoga o Fanua ma Suafa o se poloaiga e tuuina atu ai le avanoa i lalo o le faafuaiupu (3) e tatau i le Faamsinoga ona aofia i le poloaiga le ituaiga taui (pe afai e i ai) e tatau ona totogiina e le kamupani o lo o tuuina atu auaunaga i le tagata e nafa ma fanua faaleaganuu po o nofoaga ma fale.

(6) E tatau ona faaaogā aiaiga o le Tulafono o le Aveina o Eleele i lenei fuaiupu faatasi ma ia fetuunaiga ma fesuiaiga e pei ona talafeagai ai.

68. Faatutuina faatasi-(1) E tatau i kamupani e tuuina atu auaunaga o lo o i ai o latou nofoaga mo galuega tau fesootaiga ona faataga isi kamupani e tuuina atu auaunaga ina ia faatutu faatasi o latou nofoaga mo galuega tau fesootaiga i le vaega o lo o i ai nofoaga e aofia ai ae le faaatapulaaina i le faafesuia o nofoaga mo ofisa ma isi nofoaga mo meafaigaluega mo fesuiaiga o laina telefoni, fanua, taualuga o fale, tulaga o pou faailoilo, paipa o puipuiga ma pou, lea e talafeagai ai ma tulaga tau tmaoaiga lo latou faatutuina faatasi ma e le manaomia ai nisi galuega tetele o tausaga faaopoopo

(2) E tatau i le vaega o lo o talosagaina le faatutuina faatasi ona totogi taui i le vaega o lo o manaomia ina ia faatutu faatasi e pei ona o le a malilie i ai vaega o lo o aofia ai po o, e pei ona o le a faia i ai le faaiuga e le Pule Faatonu pe afai e le mafai ona malilie faatasi i ai itu uma.

(3) Afai ua lē mafai ona malilie uma vaega o lo o aofia ai i aiaiga o le faatutu faatasi, e mafai e se vaega e tasi po o vaega uma e lua ona talosaga i le Pule Faatonu ina ia faia e ia se tonu ma, afai e lē manuia le taumafaiga mo se tonu, e mafai e le Pule Faatonu ona tuuina atu se poloaiga e maua ai se faaiuga o so o se mataupu tuua i le va o itu e lua.

(4) A o le i faia se poloaiga i lalo o le faafuaiupu (3), e tatau i le Pule Faatonu ona amanaia so o se faamatalaga e tuuina atu e vaega uma, e aofia ai ma so o se mataupu sa laga mai ia faamatalaga e faasino i le saogalemu po o le tulaga ua felavasai o fetaulaiga o fesootaiga a vaega ma tagata faigaluega.

VAEGA XIII
PUIPUIGAMALU MO LE ATUNUU MA
FAALAVELAVE FAAFUASEI I TAGATA LAUTELE

69. Puipuigamalu o le Atunuu-(1) E ui lava i so o se isi tulafono, e tatau i le kamupani e tuuina atu auaunaga ona tausisia so o se talosaga tusitusia, faatonuga po o isi manaoga mai le Loia Sili e faatatau i avanoa i so o se vaega o fetaulaiga tau fesootaiga a le kamupani e tuuina atu auaunaga po o auaunaga tau fesootaiga po o faamatalaga e faasino i ai e tusa ai ma manaoga tau puipuigamalu o le atunuu po o le puipuiga po o le mafai ai ona iloa, puipuiga po o moliaga tau solitulafono o so o se faiga e solia ai ia tulafono a Samoa.

(2) E tatau i se kamupani e tuuina atu auaunaga ona saunia so o se nofoaga po o malosiaga o lo o manaomia mo le tausisia o le faafuaiupu (1) e ala i le totogiina e ia o tau, ae mafai ona talosaga i le Pule Faatonu mo se poloaiga e tagofia ai le auala e faatino ai so o se tupe totogi faaopoopo. E mafai e le Pule Faatonu ona iloilo sea talosaga e tusa ai ma so o se talosaga ua faamaonia o faasologa o tau po o le toe faaolaina o tau mo noataga mo avanoa lautele, ma faia se poloaiga e faatatau i le toe faaola mai o lea tupe alu faaopoopo.

(3) Mo le faamoemoe o le faafuaiupu (1), e mafai e le Loia Sili ona faia se faaiuga e faapea so o se mea ua tupu po o se mataupu e aafia ai le puipuigamalu o le atunuu po o le puipuiga po o le mafai ai ona iloa, po o moliaga tau solitulafono o so o se faiga e solia ai tulafono a Samoa.

70. Faalavelave Matuā i le Atunuu ma le Tulaga o Faalavelave Faafuasei-(1) I le tulaga o se faalavelave matuia ma faalavelave tutupu faafuasei e tatau i kamupnai e tuuina atu auaunaga ona tausisia so o se faatonuga e tuuina atu e le Komesina o Leoleo ma/po o le Ofisa Sili o Pulega a le Matagaluega e nafa ma le faamaopoopoga o faalavelave matuia ma faalavelave tutupu faafuasei e tali atu ai i po o le faafoia ai o faafitauli o feagai ma tagata lautele po o le Malo e tusa ai o sea faalavelave matuia po o se faalavelave faafuasei

(2) E mafai e kamupani e ua tuuina atu auaunaga ona talosaga i le Pule Faatonu mo se taui po o isi fesoasoani faatasi

ai ma tau ua faamatalaina o le tausisia o le faafuaiupu (1), ae le mo tuge pau o tuge maua a o faagaso lo so o se taimi o faamalolo le tumau ai auaunaga. E tatau i le Pule Faatonu ona iloilo so o sea talosaga e tusa ai ma lenei Tulafono ma isi tulafono o lo o faaaogāina a Samoa, ma e mafai ona faia se poloaiga e faatatau i le toe faaolaina o ia tau.

(3) Mo faamoemoega o le faafuaiupu (1), e mafai e le Komesina o Leoleo ma/po o le Ofisa Sili o Pulega o le Matagaluega e nafa ma le faamaopoopoina o faalavelave matuia ma faalavelave tutupu faafuasei ona faia se faaiuga e faapea o so o se mea ua tupu po o se mataupu o se faalavelave matuia ua aafia ai tagata lautele.

VAEGA XIV
FEESEESEAIGA, SOLITULAFONO
MA VAEGA FAAMAMALUINA

71. Feeseseaiga i le va o Kamupani o lo o tuuina atu Auaunaga-(1) Afai ua lē mafai ona malilie i se faaiuga kamupani e tuuina atu auaunaga i se mataupu e faasino i malosiaga o le Pule Faatonu i lalo o lenei Tulafono po o isi tulafono a Samoa, ma ina ua uma ni taumafaiga talafeagai e maua ai se faaiuga lelei, e mafai e se toatasi po o le sili atu o kamupani e tuuina atu auaunaga ona talosaga i le Pule Faatonu mo se fesoasoani i le foia o le feeseseaiga.

(2) I le tali atu i so o se talosaga i lalo o le faafuaiupu (1), e mafai e le Pule Faatonu ona:

- (a) tofia se sui o le aufaigaluega a le Pule Faatonu po o se tagata faufautua e taumafai e soalaupule se fofa o le feeseseaiga;
- (b) tuuina atu le feeseseaiga i le Faamsinoga Sili po o le Faamsinoga Faaitumalo; po o
- (c) tuuina atu se poloaiga ina ia faia ai se iuga o le feeseseaiga.

72. Feeseseaiga a Tagata o lo o faaaogāina auaunaga-(1) Afai o se tagata o lo o faaaogāina auaunaga, e ese mai nai lo se kamupani e tuuina atu auaunaga, e i ai se feeseseaiga i lo la va ma se kamupani e tuuina atu auaunaga

lea ua le mafai e vaega o lo o aofia ai ona teuteu e i latou lava, e ala i se taualumaga e faatino ai faitioga a le tagata o lo o faaaogāina auaunaga a se kamupani e tuuina atu auaunaga po o se isi faiga e ese ai, e aofia ai so o se taualumaga ua faamaonia e le Pule Faatonu e tusa ai ma le fuaiupu 52, e mafai e so o se isi o vaega ia e lua ona tuuina atu le feeseseaiga i le Pule Faatonu mo se fesoasoani.

(2) I le tali atu i so o se mataupu ua tuuina atu i lalo o le faafuaiupu (1), e mafai e le Pule Faatonu ona:

- (a) tuuina atu se sui o le aufagaluega a le Pule Faatonu po o se tagata faufautua e taumafai e soalaupule se fofo i le feeseseaiga;
- (b) tuuina atu le feeseseaiga i le Faamasinoga Sili po o Faamasinoga Faaitumalo; po o
- (c) e tuuina atu se poloaiga ina ia faia ai se faaiuga i le feeseseaiga.

73. Se isi Faaiuga e mafai ona foia ai Feeseseaiga-(1) E mafai e vaega o lo o aofia i se feeseseaiga ona malilie ina ia tuuina atu se feeseseaiga i se ofisa tumaoti mo le soalaupuleina o se fofo o le feeseseaiga po o se taualumaga aloaia e faia ai se fofo o le feeseseaiga.

(2) O tau a le Pule Faatonu i lalo o le faafuaiupu (1), e aofia ai ae le faatapulaaina i so o se tupe alu faatupulaia i malaga ma isi tupe alu e faaaogā e po o e avea ai ma sui o le Pule Faatonu e tusa ai o le fesoasoani po o le galuega faasalalalu a le Pule Faatonu, e tatau ona totogiina i le Pule Faatonu e vaega uma o lo o aofia i feeseseaiga.

74. Solitulafono tau Fesootaiga televavave ma Solitulafono tau Komepiuta-(1) E lē tatau i se tagata ona:

- (a) faaaogā pe taumafai e faaaogā so o se nofoaga tau fesootaiga televavae po o le taumafai ia maua so o se galuega tau fesootaiga televavae i se faiga piopio, mataua, pe lē amiotonu po o isi faameomeoga faasolitulafono e aunoa le totogiina o tau faaee atu faaletulafono;
- (b) faia ma le loto i ai, e aunoa ma se aiatau ma faatasi ai ma faamoemoega lē faamaoni po o i se isi itu e

le tusa ai ma tulafono, ua ofi atu pe taumafai e ofi atu i fetaulaiga o fesootaiga i lona tulaga atoa po so o se vaega po o faiga tau komepiuta e ala i le solia o mafuaaga tau puipuigamalu ma le faamoemoe ina ia maua ai faamatalaga faamaumauina tau fesootaiga ma komepiuta.

- (c) faia ma le loto i ai, e aunoa ma se aiatatau faatasi ai ma faamoemoega le faamaoni po o i se isi itu e lē tusa ai ma tulafono, ona ia faalavelaveina pe taumafai ina ia faalavelaveina se faasalalauga e lē o faamoemoeina mo le silafia e tagata lautele o ia faamatalaga faamaumauina tau fesootaiga faakomepiuta i, mai po o i totolu o se faiga faakomepiuta
- (d) faia ma le loto i ai e aunoa ma se aiatatau faatasi ai ma faamoemoega lē faamaoni po o i se isi itu e lē tusa ai ma tulafono, ona ia faaleaga, aveese, faaitiitia le aogā, suia se pe taofia pe taumafai e faaleaga, aveese, faaitiitia le aogā, suia pe taofia faamatalaga faamaumauina tau fesootaiga ma komepiuta
- (e) faia ma le loto i ai, e aunoa ma se aiatatau faatasi ai ma faamoemoega lē faamaoni po o i se isi itu e lē tusa ai ma tulafono, faalavelaveina pe faaluafesasi pe taumafai e faalavelaveina pe faaluafesasi le faagaoioiga o fetaulaiga o fesootaiga po o faiga faakomepiuta e ala i le tuuina atu i totolu, faasalalauna, faaleagaina, aveeesea, faaitiitia le aogā, suia pe taofia faamatalaga faamaumauina tau fesootaiga tau komepiuta
- (f) faia ma le loto i ai, e aunoa ma se aiatatau faatasi ai ma faamoemoega lē faamaoni po o i se isi itu e lē tusa ai ma tulafono, faaaogā, umia, faia pe faatauina atu, faatau mai mo le faaaogāina, faaulufale mai i totolu o le atunu, tufatufa atu po o se isi tulaga ua faia ia maua ai pe taumafai e faaaogā, umia, faia, faatau atu, faatau mai mo le faaaogāina, faaulufale mai i le atunu, tufatufa

atu po o i se isi tulaga ua faia ina ia mafai ona maua se mea faigaluega, e aofia ai ae lē faatapulaaina i se polokalame faakomepiuta, mo le faamoemoe o le faia o so o se solitulafono ua faatuina i parakalafa (a), (b), (c), (d) po o (e);

- (g) faia ma le loto i ai e aunoa ma se aiatatau faatasi ai ma faamoemoega lē faamaoni po o se isi itu e lē tusa ai ma tulafono, ona faaaogā, umia, faia, faatau atu, faatau mai mo le faaaogāina, faaulufale mai i totonu o le atunu, tufatufa atu po o i se isi tulaga e ese ai ua faia ina ia mafai ona maua pe taumafai e faaaogā, pe umia, faia, faatau atu, faatau mai mo le faaaogāina, faaulufale mai i totonu o le atunu, tufatufa atu po o i se isi tulaga e ese ai ua faia ina ia mafai ona maua se upu faataga faakomepiuta, se faailoga faapitoa e ofi atu ai po o se faamatalaga faamaumauina tutusa e mafai ai ona avanoa atu fetaulaiga tau fesootaiga po o faiga tau komepiuta i le itu po o so o se vaega ma le faamoemoe e faapea o se fetaulaiga po o faiga ua faaaogāina mo le faamoemoe o le faia o so o se solitulafono o lo o aiaia i le parakalafa (a), (b), (c), (d) po o le (e);
- (h) faaaogā, pe faia pe tuuina atu ina ia faaaogāina, pe taumafai e faaaogā pe faia pe tuuina atu ina ia faaaogā so o se fetaulaiga o fesootaiga mo le faamoemoe ia falavelaveina ai, faatiga, faatupu ita, sopo tuaoi po o le faatalatalua i so o se tagata i so o se auala, e aofia ai ae le faatapulaaina i:
 - (i) se valaau po o isi fesootaiga e i ai pe leai se faamatalaga po o isi leo; po o
 - (ii) le auina atu o faamatalaga po o foliga (vito po o isi mea); po o
- (i) faaleaga ma le loto i ai po o le taumafai ina ia faaleaga so o se galuega tau fesootaiga televavave po o nofoaga ma fale tau fesootaiga televavave e aofia ai.

(2) O tagata taitoatasi uma o i latou ia ua faia se gaoioiga e faalavelaveina ai so o se aiaiga i totolu o le faafuaiupu (1) ua faia se solitulafono ma e noatia i faasalaga ua aiaia i totolu o le fuaiupu 75.

75. Isi Solitulafono ma Faasalaga-(1) O tagata taitoatasi uma o i latou ia ua faalavelaveina po o ua taumafai e faalavelaveina so o se aiaiga o lenei Tulafono po o se tulafono faatonutonu po o se tulafono faafoe ua faia i lalo o lenei Tulafono po o ua solia se tuutuuga o laisene po o ua le tausisia se poloaiga ua faia e le Pule Faatonu po o le Komesina o Sulufaiga i lalo o lenei Tulafono ua nofosala i se solitulafono ma e noatia:

- (a) i le tulaga o se tagata moni, i se sala tupe e le silia le 50 iunite tau faasalaga mo se uluai solitulafono ma le 100 iunite tau faasalaga mo se solitulafono e faia mulimuli ane ai;
 - (b) i le tulaga o se kamupani po o isi faalapotopotoga ua tuufaatasi faaletulafono, i se sala tupe e le silia le 5,000 iunite tau faasalaga mo se uluai solitulafono ma le 10,000 iunite tau faasalaga mo se solitulafono e faia mulimuli ane ai; po o
 - (c) i le faaopoopo atu i le parakalafa (a) i le tulaga o se tagata moni o ia lea o se faatonu, pule, tagata ofisa, tagata faigaluega po o se ofisa sooupou o se kamupani po o isi faalapotopotoga ua tuufaatasia faaletulafono ma o ia lea e nafa ma le faalavelaveina, solia po o ua le usitaia e le kamupani po o le faalapotopotoga ua tuufaatasia faaletulafono, e nofo sala i le falepuipui mo se vaitaimi e le silia le lua tausaga..
- (2) O tagata taitoatasi o i latou ia:
- (a) ua faia ma le iloa lelei po o ua taumafai ina ia faia se tautinoga, talosaga, faamatalaga, lipoti o tupe maua po o se faamatalaga sese pe taufaasese pe le atoatoa mo le faamoemoe o le mauaina po o e fesoasoani ai i se isi tagata ina ia maua se laisene, maliega, faatagaga po o isi gaoiiga ua i ai le pule faataga i lalo o lenei Tulafono;

- (b) tuuina atu ma le iloa lelei, avatu pe faaoo atu i se isi faiga e ese mai ai, pe taumafai e tuuina atu, avatu pe faaoo atu i se isi faiga e ese mai ai i le Pule Faatonu po o so o se tagata o lo o galue i lalo o po o e avea ai ma sui o le Pule Faatonu so o se pepa aloaia, faamatalaga tusia po o faamatalaga sese, taufaasese pe le atoatoa e faatatau i lenei Tulafono; po o
 - (c) teena ma le loto i ai pe taofiofi pe taumafai e teena pe taofiofi le Pule Faatonu po o so o se tagata o galue i lalo o po o e avea ma sui o le Pule Faatonu i le faatinoina o so o se matafaioi, tiute tauave po o malosiaga o le Pule Faatonu i lalo o lenei Tulafono,
- ua faia e ia se solitulafono ma e noatia i faasalaga ua aiaia i lalo o le faafuaiupu (1).

(3) Afai o se solitulafono ua faia i lalo o faafuaiupu (1) po o le (2) po o ua faaauau le faia i aso e sili atu i le tasi, o le tagata o ia lea ua faia le solitulafono e noatia mo se solitulafono e ese ai mo aso taitasi ia sa faia ai pe sa faaauau ai le faia o le solitulafono.

(4) E mafai e le Faamsinoga Sili ma le Faamsinoga Faaitumalo, i luga o le talosaga a le Loia Sili po o le Pule Faatonu, ona faaee sala tupe ma tuutuuga o le nofo sala i le falepuipui i so o se tagata e tusa ai o lenei fuaiupu.

76. Tulaga Faamamaluina Faale-faamsinoga-(1) E mafai ona avea se poloaiga a le Pule Faatonu o se poloaiga a le Faamsinoga Sili i lalo o le faafuaiupu (2) ma e mafai ona faamamaluina i le faiga masani e pei ona faia i le poloaiga a le Faamsinoga.

(2) E mafai ona faia se poloaiga a le Pule Faatonu e faapei ai o se poloaiga a le Faamsinoga e ala i le faatoai atu i le Resitara o le Faamsinoga se ata o le poloaiga na faamaonia e le Pule Faatonu.

- (3) Mo le faamoemoe o le aveesea o se masalosaloga;
- (a) e mafai e le Pule Faatonu ona faamamaluina so o se poloaiga a le Pule Faatonu tusa lava pe ua avea

pe lē avea foi le poloaiga o se poloaiga a le Faamasinoga Sili; ma

- (b) o se poloaiga a le Pule Faatonu ua faia o se poloaiga a le Faamasinoga Sili i lalo o lenei fuaiupu e tatau ona faamamaluina mai le aso o le poloaiga a le Pule Faatonu ae le mai le aso na faatoai ai sea poloaiga i le Faamasinoga i lalo o le faafuaiupu (2).

77. Mataituna ma le Faamamaluina-(1) E ui lava i so o se isi tulafono, i le faaopoopo atu i nisi lava malosiaga o lo o i totonu o lenei Tulafono, o tulafono faatonutonu, tulafono faafoe, o laisene po o poloaiga po o i lalo o se isi lava tulafono, e tatau i le Pule Faatonu, mo faamoemoega o le faatinoina o matafaioi, galuega tauave ma malosiaga o le Pule Faatonu i lalo o lenei Tulafono, e i ai le malosiaga e faia ai poloaiga ina ia:

- (a) manaomia le tuuina atu o pepa aloaia ma faamatalaga e Kamupani ua laiseneina ma nisi lava tagata;
- (b) saili fale ma faoa faamalosi meafaigaluega ma isi meataitasi;
- (c) manaomia le auai ma le suesuega o tagata molimau i lalo o le tautoga po o faamaoniga po o se isi faiga e ese mai ai; ma
- (d) manaomia tagata e tauave gaoioiga maoti pe taofia gaoioiga maoti i le tulaga ua solia ai lneei Tulafono, o tulafono faatonutonu, tulafono faafoe po o poloaiga po o i lalo o so o se isi tulafono.

(2) E tatau i le Komesina o Leoleo ma leoleo uma ona tuuina atu le fesoasoani talafeagai i le Pule Faatonu e pei ona manaomia e le Pule Faatonu i le faataunuina o matafaioi, galuega tauave ma malosiaga a le Pule Faatonu i lalo o lenei Tulafono ma so o se isi tulafono.

78. Noataga tau le va o Tagata-(1) I le noatia ma le fai fuafua i so o se tapulaa o po o tuusaunoaga mai noataga ua faaee atu ina ia tusa ai ma lenei Tulafono po o se isi tulafono, e mafai e se tagata o ia lea ua tauaveina ni tulaga mafatia po o ni

mea ua faaleagaina ona o se taunuuga o so o se gaoioiga po o mea ua le faia e feteenai i lenei Tulafono, po o se tulafono faatonutonu, tulafono faafoe po o se poloaiga ua faia i lalo o lenei Tulafono, ona faia se tagi i le Faamsinoga Sili po o le Faamsinoga Faa Itumalo mo ma le toe faaola mai o se aofaiga o tupe e tutusa tau ma mea ua leiloa po o mea ua faaleagaina mai so o se tagata sa auai ai, faatonutina, faatagaina, malie i ai pe sa auai i le faatinoga o le gaoioiga po o mea ua le faia.

(2) E lē mafai ona molia se gaoioiga e tusa ai o ni mea leiloa po o ua faaleagaina o lo o faasinomia i ai le faafuaiupu (1) pe afai ua silia i le lua tausaga ina ua tuanai le aso sa faia ai le gaoioiga po o mea ua le faia.

(3) E leai se vaega i totonu o faafuaiupu (1) po o le (2) e faaaogā i so o se gaoioiga mo le solia o se konekarate ina ia tuuina atu auaunaga tau fesootaiga mamo po o so o se gaoioiga mo le faaleagaina e faasino i se fua faatatau e faaee atu e se tagata e tuuina atu auaunaga.

79. Puleaga faa-Faamsinoga Sili ma le Faamsinoga faa-Itumalo-(1) I le noatia ma le fai fuafua i lenei Tulafono, e tatau ona i ai le puleaga faa-faamsinoga a le Faamsinoga Sili ma le Faamsinoga faa-Itumalo e tagofia ai mataupu uma ua tuuina atu i sea Faamsinoga i lalo o le Tulafono, e aofia ai ae le faatapulaaina i gaoioiga tau le va o tagata ua faatoai atu i lalo o le faafuaiupu 78 ma feeseseseaiga ua tuuina atu i le Faamsinoga i lalo o fuaiupu 71 ma le 72.

(2) E tatau ona i ai le puleaga faa-faamsinoga a le Faamsinoga Sili ma le Faamsinoga faa-Itumalo e fofogaina ai ma faia se faaiuga o so o se mataupu lea e aiaia a ii lenei Tulafono le puleaga faa faamsinoga a ia faamsinoga tusa lava pe sa tupu i Samoa po o se isi lava nofoaga se gaoioiga po o mea ua le faia po o se mea sa tupu.

VAEGA XV AIAIGA ESEESE

80. Puipuiga tau le va o tagata mo le Pule Faatonu-(1)
O talosaga ua faia e po o e faasaga i le Pule Faatonu e tatau ona faia e tusa ai ma le Tulafono o Taualumaga a le Malo 1974.

(2) E ui lava i so o se isi tulafono, e ese mai i le Faavae, e leai se gaoioiga, tagi po o ni taualumaga ma so o se gaoioiga po o se mea ua le faia e faasino i matafaioi, malosiaga po o tiute tauave ua faaee atu i le Pule Faatonu i lenei Tulafono e tatau ona faatoai pe tausia e faasaga i:

- (a) so o se tagata o ia lea sa po o le Pule Faatonu pe afai
o sea tagata sa po o o lo o galue i le agaga lelei;
po o
- (b) so o se tagata o ia lea po o o lo o galue i lalo o le
pule faataga a le Pule Faatonu i lalo o le
Tulafono pe afai o sea tagata sa po o o lo o galue
i le agaga lelei.

81. Tulafono Faatonutonu-(1) E mafai e Le Ao o le Malo, i le faia i luga o le fautuaga a le Kabeneta, ona faia tulafono faatonutonu mo ia mataupu e pei ona fuafuaina po o e talafeagai ai mo le faamamaluina atoatoa o aiaiga o lenei Tulafono ma mo le pulega tatau o lea Tulafono.

(2) E aunoa ma le faatapulaaina o le malosiaga ua faaee atu i lalo o le faafuaiupu (1) e mafai ona faia tulafono faatonutonu mo le foafoaina o solitulafono e faatatau i lenei Tulafono ma faamatala ai sala tupe mo ia solitulafono ia le silia le 100 iunite tau faasalaga.

82. Faamatalaga molimau e ala i Tusi Faamaonia – E ui lava i so o se isi tulafono, i totonu o taualumaga i lalo o po o e faatatau i lenei Tulafono, e aofia ai ae lē faatapulaaina i se moliai mo se solitulafono, o se tusi faamaonia ua sainia e po o e avea ai ma sui o le Pule Faatonu ma taua ai:

- (a) e faapea o so o se aso sa umia ai ese tagata po o e lē
o se tagata o umia se laisene sa tuuina atu e tusa
ai o le Tulafono;
- (b) e faapea o lena aso sa faia ai e le Pule Faatonu po o
sa tuuina atu i se faiga e ese mai ai pe teuteuina
pe faalēaogaina pe soloia ai se tulafono faafoe,
poloaga, laisene, faatonuga, taiala po o isi
gaoioiga ua i ai le pule faataga i lalo o le
Tulafono;

- (c) mataupu i totonu o se tulafono faafoe, poloaiga, laisene, faatonuga, taiala po o isi gaoioiga ua i ai le pule faataga ua faia po o ua tuuina atu i se isi faiga e ese ai po o ua teuteuina pe faalēaogaina pe soloia e le Pule Faatonu i lalo o lenei Tulafono,
e tatau ona avea ma faamatalaga molimau ua lava saunia o mea moni ua taua i totonu o le tusi faamaonia ma e tatau ona talia sea tusi faamaonia e avea o se tusi faamaonia ua faapena ona sainia vagana ai ua faamaonia se tulaga feteenai.

83. Faaooina atu o Faasilasilaga ma isi mea-(1) Afai i lalo o lenei Tulafono e manaomia pe faatagaina se faasilasilaga, poloaiga, tusi, isi pepa aloaia po o se gaoioiga ua i ai le pule faataga ina ia faaoo atu i so o se tagata, e mafai ona faaoo atu le faasilasilaga, poloaiga, tusi, isi pepa aloaia po o gaoioiga ua i ai le pule faataga:

- (a) i le tulaga o le faaoo atu i le Pule Faatonu; e:
 (i) faaoo atu le faasilasilaga, poloaiga, tusi, isi pepa aloaia po o gaoioiga ua i ai le pule faataga i le ofisa o le Pule Faatonu a o faagasolo itula faigaluega masani; po o
 (ii) lafona atu le faasilasilaga, poloaiga, tusi, isi pepa aloaia po o isi gaoioiga ua i ai le pule faataga i le meli ua uma ona totogiina pe auina atu i le fesi i le tuatusi meli po o le tuatusi fesi, i le a lava le tulaga e manaomia e le mataupu, i le ofisa o le Pule Faatonu; ma
- (b) I le tulaga o le faaoo atu i so o se isi tagata; e:
 (i) faaoo atu le faasilasilaga, poloaiga, tusi, isi pepa aloaia po o gaoioiga ua i ai le pule faataga i le tagata i le tuatusi ua filifilia o le tagata i totonu o Samoa i so o se talosaga ua faia le tagata i le Pule Faatonu po o i le tuatusi ua filifilia i totonu o Samoa o le tagata i totonu o so o se laisene po o i isi gaoioiga ua i ai le pule faataga ua aafia ai le tagata sa tuuina atu po o ua sainia e po o e avea ai ma sui o Pule Faatonu;

(ii) faaoo atu le faasilasilaga, poloaiga, tusi, isi pepa aloaia po o gaoioiga ua i ai le pule faataga, a o faagasolo itula masani faigaluega, i le tuatusi i totonu o Samoa o so o se loia o lo o galue e avea ma sui faaletulafono o le tagata; po o

(iii) lafona atu le faasilasilaga, poloaiga, tusi, isi pepa aloaia po o gaoioiga ua i ai le pule faataga i le meli ua uma ona totogiina po o le fesi i le tuatusi meli i Samoa po o le tuatusi fesi, e pei ona manaomia i le mataupu, ua filifilia e le tagata i totonu o so o se talosaga sa faia e le tagata i le Pule Faatonu po o ua filifilia i totonu o so o se laisene po o isi gaoioiga ua i ai le pule faataga ua aafia ai le tagata sa tuuina atu i ai po o sa sainia e avea ai ma sui o le Pule Faatonu; po o

(iv) lafona atu le faasilasilaga, poloaiga, tusi, isi pepa aloaia po o le gaoioiga ua i ai le pule faataga e ala i le meli ua uma ona totogiina, po o le auina i le fesi i le tuatusi meli po o le tuatusi fesi i totonu o Samoa, i le a lava le tulaga o manaomia i le mataupu, o so o se loia o lo o galue e avea ma sui faaletulafono mo le tagata.

(2) Mo faamoemoega uma i le tulaga o le faaoo atu e ala i le lafona i le meli ua uma ona totogiina, e tatau ona avea e faapea ua faataunuina le faaooina atu i le lua aso mai le aso sa lafona ai.

(3) Mo faamoemoega uma i le tulaga o le auina atu i le fesi:

(a) e tatau ona avea e faapea sa faataunuina atoatoa le auina atu e aunoa ma se faamatalaga molimau e uiga i le lē maua po le lē atoatoa o le auina atu;

(b) e tatau ona lava atoatoa se saini lomia pe pueina se ata mo so o se faasilasilaga, poloaiga, tusi, isi pepa aloaia po o gaoioiga ua i ai le pule faataga ua auina atu i le fesi.

84. Teuteuga i Faamatalaga- E mafai ona teuteuina le Faamatalaga i le Tulafono e le Minisita, i le faia i luga o le fautuaga a le Kapaneta, e ala i se faasilasilaga e lomia faasalalau

i le gagana Samoa ma le gagana Peretania i le Savali po o se isi nusipepa o faasalalauna i totonu o Samoa.

85. Aiaiga Faasaoina ma Aiaiga tau Soloaiga-(1) O faasinomaga uma i totonu o tulafono po o so o se pepa aloaia po o se gaoioiga ua i ai le pule faataga i le Matagaluega o Fale Meli po o le Matagaluega o Meli ma Fesootaiga Mamao po o i latou ua tauaveina lea galuega e tatau ona faitauina ia faasinomia e le mataupu se isi uiga e ese ai.

(2) I le tulaga o le ogatasi ai ma aiaiga o lenei Tulafono, o tulafono faatonutonu taitasi uma, poloaiga, pepa aloaia ma gaoioiga ua i ai le pule faataga i lalo o po o e faatatau i le tulafono ua faataoto mai i totonu o le Faamatalga i lenei Tulafono, afai lava o lo o faaaogā pea ma o lo o faamamaluina i le taimi o le soloia o sea tulafono, e tatau ona faaauau pea ma faaaogā i lalo o aiaiga talafeagai o lenei Tulafono seja oo i se taimi e suia ai, teuteu pe faalēaogaina, i le a lava le tulaga e manaomia e le mataupu, i lalo o aiaiga o lenei Tulafono ma, afai e ia i se fesiligia po o se atugaluga i le fia iloa po o se a se aiaiga talafeagai o lenei Tulafono, e mafai e le Minisita e ala i se tusitusiga mo faamoemoega uma ona faailoa se aiaiga o lenei Tulafono ina ia avea o se aiaiga talafeagai.

(3) E ui lava i aiaiga o lenei Tulafono, o talosaga uma ma isi mataupu aliae mai i po o i lalo o aiaiga o le tulafono ua faataoto mai i totonu o le Faamatalaga i lenei Tulafono ia e le i faia i ai se faaiuga pe tagofia i se isi faiga e ese ai i lalo o ia aiaiga i le aso e amata faamamaluina ai lenei Tulafono, e tatau ona faia i ai se faaiuga pe tagofia i se isi faiga e ese ai i lalo o aiaiga talafeagai o lenei Tulafono faatasi ma ia fesuaiga, suiga ma fetuunaiga e pei ona mafai e le Minisita ona faia i ai le faaiuga i se faiga tusitusia mai lea taimi i lea taimi.

(4) O faalapotopotoga taitasi uma faufautua ua faavaeina e le Minisita i lalo o le Tulafono o le Matagaluega o Fesootaiga ma Faamatalaga Tekonolosi 2005.

(5) E ui lava i aiaiga o lenei Tulafono, afai o lenei Tulafono e lē o aiaia ai po o aiaia ai aiaiga e lē atoatoa ma lē talafeagai mo le soloaiga mai le tulafono ua faataoto mai i totonu o le Faamatalaga i lenei Tulafono, e mafai e le Minisita, e ala i se faasilasilaga e lomia faasalalau i le gagana Samoa ma le gagana

Peretania i le Savali ma se isi nusipepa o lo o faasalalauina i totonu o Samoa, ona faia ia aiaiga e pei ona manatu le Minisita ua tatau ai ina ia faia i ai se faaiuga lelei ma atoatoa pe tagofia i se isi auala e ese a i lalo o aiaiga o lenei Tulafono mo mataupu uma i lalo o po o e faatatau i le tulafono ua faataoto mai i totonu o le Faamatalaga ma lenei Tulafono.

86. Aiaiga tau Soloaiga mo Laisene na tuuina atu muamua - E ui lava i aiaiga o lenei Tulafono:

(1) E mafai ona talosaga i so o se taimi ina ua tuanai le amata faamamaluina o lenei Tulafono, o le umia se laisene i le taimi nei ("laisene na tuuina atu muamua") sa tuuina atu a o lumana'i le amata faamamaluina o lenei Tulafono i le Pule Faatonu ina ia faalēaoga le laisene sa tuuina atu muama a lē o lo o umia ma talosaga ina ia faafoeina i lalo o se laisene fou ua tuuina atu ina ia tusa ai ma lenei Tulafono.

(2) Afai e le i talosaga le tagata o lo o umia se laisene sa tuuina atu muamua mo le faaliliuina o lea laisene i ni tulaga e faatagaina ai le tagata o lo o umia ina ia faia faapena i lalo o lenei fuaiupu i totonu o le ono (6) masina ina ua tuanai le amata faamamaluina o lenei Tulafono, e mafai e le Pule Faatonu ona tuuina atu se poloaiga e faalēaoga ai le laisene sa tuuina atu muamua ma tuuina atu se laisene fou ina ia tusa ai i lenei Tulafono.

(3) I isi lava itu uma, o le faafoeina o galuega tau fesootaiga mamao faapea le tuuina atu o auauanga tau fesootaiga mamao i lalo o laisene sa tuuina atu muamua e tatau ona noatia ma fai fuafua i le laiseneina ma isi manaoga o lenei Tulafono, ma tulafono faatonutonu uma o lo o faaaogāina, o tulafono faafoe, poloaiga ma taualumaga o le laiseneina.

(4) O malosiaga o le Pule Faatonu e faamatuu ai se laisene i lalo o lenei Tulafono e tatau ona faaaogā e ese mai ai so o se tulafono, feagaiga, konekarate, fetuunaiga po o laisene sa tuuina atu muamua (o le a lava le igoa e tau ai) ia sa tuuina atu i se tagata ma o lo o faaaogā i le taimi na amata faamamaluina ai le Tulafono o Teuteuga o le Tulafono o Fale Meli 2004.

(5) Afai:

- (a) ua faamatuu atu e le Minsita se laisene i lalo o le Tulafono o Fale Meli 1972 po o le Tulafono o Teuteuga o le Tulafono o Fale Meli 2004; po o

(b) ua faamatuu atu e le Pule Faatonu se laisene i lalo o lenei Tulafono; ma
(c) ua fautuaina e le Loia Sili ma le Ofisa Sili o Pulega o le Matagaluega o Tupe le Kapaneta i se faiga tusitusia e faapea o le faamatuu atu o sea laisene ua aafia ai i se tulaga le manuia aiatatau a se tagata i lalo o se feagaiga o lo o faaaogāina, konekarate, fetuunaiga, laisene po o isi aiaiga (o le a lava le igoa o ta'u ai),
e mafai e le Kapaneta, i lana pule faitalia, ona faia le faatagaga e tuuina atu ai taui i sea tagata i tulaga tau tupe, meaalofa, faamaumauga po o isi auala e ese a i ni aofaiga ma/po o se faiga e mafai ona fautuaina e le Loia Sili ma le Ofisa Sili o Pulega a le Matagaluega o Tupe i se faiga tusitusia.

(6) Afai e i ai se tulaga lē ogatasi i le va o aiaiga o lenei fuaiupu ma aiaiga o le fuaiupu 85, e tatau ona tumau pea le aloaia o aiaiga o lenei fuaiupu.

(7). E tatau i le Pule Faatonu ona tuuina atu ni laisene pe faia nisi gaoioiga ua faatagaina i lalo o lenei Tulafono e faatinoina ai manaoga o le feagaiga tusitusia na fautuaina e le Minisita e aofia ai le Malo, SamoaTel, le Telecom Samoa Cellular Limited ma le Telecom Pacific Investments Limited.

FAAMATALAGA**Tulafono ua Soloia**

1. Tulafono o Fale Meli ma Fesootaiga Tau Komepiuta Faava o Malo 1997.
 2. Tulafono o Fale Meli 1972 – Vaega II, V, VI, IX, ma le X.
 3. Tulafono o Galuega Tau Meli ma Fesootaiga 1999 – Vaega III ma le IV.
-

**O le Tulafono o Fesootaiga 2005 o lo o faafoeina i le Matagaluega
o Fesootaiga ma Faamatalaga Tekonolosi**

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono**